


廣文選


六十九之七十八



漢書門類			
一	一	七	八
二	二	九	五
冊	架	函	號

內閣文庫			
三	一		漢
六	一	八	書
二	二	五	
函	冊	號	類
一			
八			
架			

內閣文庫			
番號	漢	11085	
冊數	12 (11)		
函號	361	38	





文選卷第六十九

明通議大夫都察院右副都御史

淺草文庫

說廣

籍田說

曹子建

春耕于籍田郎中令侍寡人焉顧而謂之曰昔者神農氏始嘗萬草教民種植今寡人之興此田將欲以擬乎治國非徒娛耳目而已也夫營疇萬畝厥田上下經以大陌帶以橫干此亦寡人之封疆也日殄沒而歸館晨未昕而即野此亦寡人之先下也菽藿特疇禾黍異田此寡人之理政也及其息也涌庇重陰懷有虞撫素琴此亦寡人之所親賢也臭蔚弃之遠壇此亦寡人之所遠也佞若年豐歲登果茂菜滋則臣僕小大咸取驗

馬又曰封人有能以輕繫脩鉤去樹之蝎者樹得以茂
繁中舍人曰不識天下者亦有蝎者乎寡人告之曰昔
三苗共工鯀驩堯非堯之蝎與問曰諸侯之國亦有蝎
乎寡人告之曰齊之諸田晉之六卿魯之三桓非諸侯
之蝎與然三國無輕繫脩鉤之任終於齊篡魯弱晉國
以分不亦痛乎曰不識為君子者亦有蝎乎寡人告之
曰固有之也富而慢貴而驕殘仁賊義甘財脫色此亦
君子之蝎也天子勤耘以牧一國大夫勤耘以收世祿
君子勤耘以顯令德夫農者始於種終於穫澤既時矣
苗既美矣弃而不耘則改為荒疇蓋豐年者期於必收
譬修道者亦期於沒世

黽黽說

曹子建

曹子遊乎陂塘之濱步乎菴穢之藪蕭條潛虛經幽踐
阻顧見髑髏塊然獨居於是伏軾而問之曰子將結纓
首劍殉國君乎將被堅執銳斃三軍乎將嬰茲固疾命
隕傾乎將壽終數極歸幽冥乎叩遺骸而歎息哀白骨
之無靈慕嚴周之滴楚儻託夢以通情於是倅若有來
恍若有存影見容隱厲聲而言曰子何國之君子乎既
枉輿駕閔其枯朽不惜咳唾之音而慰以若言子則辯
於辭矣然未達幽冥之情死生之說也夫死之為言歸
也者歸於道也道也者身以無形為主故能與化推移
陰陽不能更四時不能虧是故洞於纖微之域通於恍
惚之庭望之不見其象聽之不聞其聲搗之不克注之
不盈吹之不竭噓之不榮激之不流凝之不凝寥落冥

漢與道相拘假然長寢樂莫是踰曹子曰余將請之上
帝求詣神靈使司命輟籍及子骸形於是鬮體長呻廓
然歎曰甚矣何子之難語也太素氏不仁勞我以形苦
我以生今也幸變而之死是反五世具也何子之好勞而
我之好逸乎余將歸于太虛於是言卒絕纏神光霧除
顧將旋軫乃命僕夫拂以玄塵覆以縞巾爰將藏彼路
濱覆以丹土翳以綠榛夫存亡之異世乃宣尼之所陳
何神憑之虛對云死生之必均

連珠

連珠

楊雄

臣聞明君取士貴拔衆之所遺忠臣不薦善廢格而所
排是以巖穴無隱而側陋章顯也

連珠三首

班固

臣聞公輸愛其斧故能妙其巧明主貴其士故能成其
治臣聞良匠度見材而成大厦明主器其士而建功業

又

臣聞聽決價而資王者無楚和之名因近習而取士者
無伯玉之功故璵璠之爲寶非駟儉之術也伊呂之佐
非左右之舊

又

臣聞鸞鳳養六翮以凌雲帝王乘英雄以濟民易曰鴻
漸于陸其羽可以爲儀臣聞馬伏阜而不用則駑與良
而爲羣士齊僚而不職則賢與愚而不分

擬連珠

潘元戎

臣聞媚上以布利者臣之常情主之所患忘身以憂國者臣之所難主之所願是以忠臣背利而修所難明主排患而獲所願

連珠 三首

魏文帝

蓋聞琴瑟高張則哀彈發節士抗行則榮名至是以申胥流音於南極蘇武揚聲於朔裔

蓋聞四節異氣以成歲君子殊道以成名敬微子奔走而顯比干剖心而榮

蓋聞驚蹇服御良藥咨嗟鈇刀剖截區冶歎息故少師幸而季梁懼宰詔任而伍員憂

倣連珠 四首

王仲宣

臣聞明主舉賢不待近習聖君用人不拘毀譽故呂尚一見而為師陳平烏集而為輔

又

臣聞記功誌過君臣之道也不念舊惡賢人之業也是以齊用管仲而霸功立秦任子明而晉耻雪

又

臣聞振鷺雖林飛六翮無以翔四海帝王雖賢非良臣無以濟天下

又

臣聞觀於明鏡則疵瑕不滯於軀聽於直言則過行不累乎身

連珠 四首

謝惠連

蓋聞獻技者易忽養德者難致是以子張重研不獲哀

公之祿于木偃息不受文侯之位

蓋聞機心難湛不接異類淳德易孚可狎殊方是以高羅舉而雲鳥降海人萃而水禽翔

蓋聞春蘭早芳實忌鳴鳩秋菊晚秀無憚繁霜何則繁乎始者易悴貞乎末者難傷一以傳長沙而志沮登公馬名揚

蓋聞修己知足慮德其逸音榮昧進志忘其審是以河滿腸而求安愈泰綠木磬高而畏下滋甚

範連珠

顏延年

蓋聞匹夫履順則天地不違一物投誠則神明可交有微而逾著理有闇而必昭是以魯陽傾首離光為之反舍有鳥拂波河伯為之不潮

又

王仲寶

蓋聞王佐之才雖遠豈必見採於當世陵雲之氣徒盛無以自致於雲間是故魏人指王於外野和氏泣血於荆山

連珠 二首

沈休文

臣聞烈風雖震不斷蔓草之根朽壤誠微遂實崇山之峭是以一夫不佳威於赫怒千乘必致亡於巧笑

臣聞鳴籟受響非有志於要風洎流長邁寧厝心於歸海是以萬竅怒號不扣而咸應百川是納用卑而為宰箴上

周虞人箴

茫茫禹迹畫為九州經啓九道民有寢廟獸有茂草各

有攸處聽用不擾在帝夷羿冒于原獸忘其國恤而思其塵壯武不可重用不恢于夏家獸臣司原敢告僕夫

百官箴

揚子雲

冀州牧箴

洋洋冀州鴻原大陸岳陽是都島夷皮服潺湲河流夾以碣石三后攸降列為侯伯降周之末趙魏是宅冀土糜沸炫沄如湯更盛更衰載從載橫陪臣擅命天王是替趙魏相及秦拾其弊北築長城恢夏之場漢興定制改封藩王仰覽前世厥力孔多初安如山後崩如崖故治不忘亂安不遺危周宗自怙云焉有子墮六國奮矯果絕其維牧臣司冀敢告在階

兗州牧箴

悠悠濟河兗州之寓九河既導雷夏攸處草繇木條漆絲締紆濟潔既通降丘宅土成湯五徙卒都于亳盤庚北渡救野是宅丁感雉雉祖已伊忠爰正厥事遂緒高宗厥後陵遲顛覆湯緒西伯戡黎祖伊奔走致天威命不恐不震婦言是用牝雞是晨三仁既知武果戎殷牧野之禽豈復能耽甲子之朝豈能復笑有國雖久必畏天咎有民雖長必懼人殃箕子歔歔厥居為墟牧臣司兗敢告執書

青州牧箴

茫茫青州海岱是極鹽鐵之地鈇松怪石群水攸歸萊夷作牧貢篚以時莫怠莫違昔在文武封呂於齊厥土塗泥在丘之營五侯九伯是討是征馬殆其銜御失其

度周室荒亂小白以霸諸侯僉服復尊京師小白既沒
周卒陵遲嗟茲天王附命下土失其法度喪其文武牧
臣司青敢告執矩

徐州牧箴

海岱伊淮東海是渚徐州之士邑于蕃宇大野既渚有
羽有蒙孤桐蠙珠泗沂攸同實列蕃蔽侯衛東方民好
農蠶大野以康帝癸及辛不祇不格沈湎于酒而忘其
東作天命湯武勦絕其緒祚降周任姜鎮于瑯琊姜姓
絕苗田氏攸都事田細微不慮不圖禍如丘山本在萌
芽牧臣司徐敢告僕夫

揚州牧箴

矯矯揚州江漢之游彭蠡既渚陽鳥攸處橘柚羽貝瑤
蠃篠蕩閩越北垠沅湘攸往獮矣淮夷蠹蠹荆蠻翩彼
昭王南征不旋人咸躡於垓莫躡於山咸跌於汚莫跌
於川明哲不云我昭童蒙不云我昏湯武聖而師伊呂
桀紂悖而誅逢干蓋邇不可不察遠不可不親靡有孝
而逆父罔有義而忘君大伯遜位基吳紹類夫差一誤
大伯無祚周室不匡勾踐入霸當周之隆越裳重譯春
秋之末侯甸叛逆元首不可不思股肱不可不孳堯崇
屢省舜盛欽謀牧臣司揚敢告執籌

荊州牧箴

杳杳巫山在荆之陽江漢朝宗其流湯湯夏君遭鴻荆
衡是調雲夢塗泥包匭菁茅金玉砥礪象齒元龜貢篚
百物世世以饒戰戰慄慄至桀荒溢曰我在帝位若天

有日不順庶國孰敢余奪亦有成湯果秉其鉞放之南
巢號之以桀南巢茫茫包楚與荆風慄以悍氣銳以剛
有道後服無道先強世雖安平無敢逸豫牧臣司荆敢
告執御

豫州牧箴

郁郁荆河伊雒是經棠椿杲漆惟用攸成田田相拏廬
廬相距夏殷不都成周攸處豫野所居爰在鶉墟四隩
咸宅寓內莫如陪臣執命不慮不圖王室陵遲喪其爪
牙靡哲靡聖捐失其正方伯不維韓卒擅命文武孔純
至厲作餐成康孔寧至幽作傾故有天下者母曰我大
莫或余敗母曰我強靡克余亡夏宅九州至於季世放
于南巢成康太平降及周微帶蔽屏營屏營不起施于

孫子王振為極實絕周祀牧臣司豫敢告柱史

益州牧箴

巖巖崑山古曰梁州華陽西極黑水南流茫茫洪波鮫
堙降陸于時八都厥民不隩禹導江沱岷嶓啓乾遠近
底貢磬錯罍丹絲麻條暢有粳有稻自京徂粵民攸溫
飽帝有桀紂滔沈頗僻遏絕苗民滅夏殷績爰周受命
復古之常幽厲夷業破絕為荒秦作無道三方潰叛義
兵征暴遂國于漢拓開疆宇恢梁之野列為十二光羨
虞夏牧臣司梁是職是圖經營盛衰敢告士夫

雍州牧箴

黑水西河橫截崑崙崙崙柘閭闔畫為雍垠上侵積石下
礙龍門自彼氏羗莫敢不來庭莫敢不來匡每在季主

常失厥緒侯紀不貢荒侵其寓陵遲衰微秦據以戾興
兵山東六國顛沛上帝不寧命漢作京隴山徂以列爲
西荒南排勁越北起疆胡并連屬國一護攸都蓋安不
忘危盛不諱衰牧臣司雍敢告齎衣

幽州牧箴

蕩蕩平川惟冀之別北阨幽都戎夏交福伊昔唐虞實
爲平陸周末荐臻追于獯鬻晉溺其陪周使不阻六國
擅權燕趙本都東陌穢陌羨及東胡疆秦北排蒙公城
壇大漢初定介狄之荒元戎屢征如風之騰義兵涉漠
偃我邊萌既定且康復古虞唐盛不可不圖衰不可或
忘隄潰蟻穴器漏箴芒牧臣司幽敢告侍傍

并州牧箴

雍別朔方河水悠悠北辟獯鬻南界涇流蓋茲朔上
直幽方自昔何爲莫敢不來貢莫敢不來王周穆遐祀
犬戎不享爰貶伊德侵玩上國宣王命將攘之涇北宗
周罔職日用葵藿既不俎豆又不干戈犬戎作亂斃于
驪阿太上曜德其次曜兵德兵俱顛靡不悴荒牧臣司
并敢告執綱

交州牧箴

交州荒裔水與天際越裳是南荒國之外爰自開闢不
羈不絆周公攝衽白雉是獻昭王陵遲周室是亂越裳
絕貢荆楚逆叛四國內侵蠶食周宗臻于季報遂以滅
亡大漢受命中國兼該南海之宇聖武是恢稍稍受羈
遂臻黃支杭海三萬來牽其犀盛不可不憂隆不可不

懼顧瞻陵遲而忘其規摹亡國多逸豫而存國多難泉
竭中虛池竭瀕乾牧臣司交敢告執憲

光祿勳箴

經兆宮室畫為中外廊殿門闥限以禁界國有周衛民
有蕃籬各有攸保守以不岐昔在夏殷桀紂淫酒特牛
之飲門戶充亂郎雖執戟謁者參差殿中成市或鼓或
鞞忘其廊廟而聚夫逋逃四方多罪載號載呶內不可
不省外不可不清德人立朝議士充庭祿臣司光敢告
執經

衛尉箴

茫茫上天崇高其居設置山險畫為防禦重垠累垓以
難不律闕為城衛以待暴卒國有以固民以有內各保
其守未修不敏維昔庶僚官得其人荷戈而歌中外以
整齊栢沐陽宿衛不飭門非其人戶廢其職曹子標劍
遂成其詐軻挾七首而衛人不寤二世妄宿敗於望夷
閭樂矯搜戟者不誰尉臣司衛敢告執維

太僕箴

肅肅太僕車馬是供鏘鏘和鸞駕彼時龍昔在上帝巡
狩四宅王用三驅前禽是射紂作不令武王征殷檀車
孔夏四駟孔昕天執條載駟我輿云安我馬惟閑
雖馳雖驅匪逸匪愆昔有淫弄馳騁忘歸景公千駟而
淫於齊詩好牡馬牧於駟野輦車就牧而詩人興魯廐
焚問人仲尼厚醜孟子蓋惡夫廐多肥馬而野有餓殍
僕臣司駕敢告執皂

廷尉箴

天降五刑惟夏之愆亂茲平民不回不辟昔在蚩尤爰
作淫刑延于苗民夏氏不寧穆王幸荒甫侯伊謀五刑
訓天周以阜基厥後凌遲上帝不觐周輕其制秦繁其
辜五刑紛紛靡盬靡止寇賊滿山刑者半道昔唐虞象
刑天民是全紂作炮烙墜民于淵故有國者無云何謂
是刑是劓無云何害是剝是割惟虐惟殺人莫予柰殷
以刑顛秦以酷敗獄臣司理敢告執謁

大鴻臚箴

蕩蕩唐虞經通該極陶陶百王天工人力畫為上下羅
條百職人有材能察有級差遷能授官各有攸宜主以
不廢官以不墮昔在三代二季不蠲穢德慢道署非其
人人天其材職及其官案察荒耄國政如漫文不可
武不可文大小上下不可奪倫鴻臣司爵敢告在隣

宗正箴

巍巍帝堯欲親九族經哲宗伯禮有攸訓屬有攸籍各
有育子世以不錯昔在夏時太康不恭有仍二女五子
家降晉獻悖統宋宣亂序齊桓不胤而忘其宗緒周譏
戒女魯喜子同高作秦禁而扶蘇被凶宗廟荒墟冤靈
靡附伯臣司宗敢告執主

大司農箴

時惟大農爰司金穀自京徂荒粒民是斛肇自厥初實
施惟食厥僚后稷有無遷易實均實贏惟都作程旁求
衣食厥民攸生上稽一帝下閱三王什一而征為民作

常遠近貢篚百姓不忘帝王之盛咸在農殖季周爛漫而東作不勅膏腴不獲廢物並荒府藏單虛靡積靡倉陵遲衰微姬卒以痒秦收太平二世不瘳泣血之有海內無聊農臣司均敢告執繇

少府箴

實實少府奉養是供紀經九品臣子攸同海內幣帑祁祁如雲家有孝子官有忠臣其僚率舊聖則越遵民以不擾國以不煩昔在帝季癸辛之世酒池糟隄而象箸以噬至於耽樂流酒而姮妹作崇共寮不御不恢夏殷喪其國康而卒以陵遲嗇不可不察欲不可不圖未嘗夫之於約常失於奢府臣司共敢告執觚

執金吾箴

溫溫唐虞重襲純執經表九德張設武官以御寇賊如虎有牙如鷹有爪國以自固獸以自保牙爪蔥蔥動作宜時用之不理實友生災秦政暴戾播其威虐亡其仁義而思其殘酷猛不可重任威不可獨行堯咨虞舜惟思是尚吾臣司金敢告執璜

將作大匠箴

侃侃將作經構宮室墻以禦風宇以蔽日寒暑攸除鳥鼠攸去王有宮殿民有宅居昔在帝世茅茨土階夏卑宮觀在彼溝洫桀作瑤臺紂為璇室人力不堪而帝業不卒詩詠宣工由儉改奢觀豐上六大一小家春秋譏刺書彼泉臺兩觀雉門而魯以不恢或作長府而閔子不仁秦築驪阿嬴姓以顛故人君無云我貴稂題是遠

母云我富淫作極遊在彼墻屋而忘其國戮作臣司匠
敢告執猷

城門校尉箴

幽幽山川徑塞九路盤石唐芒襲險重固國有城溝家
有析柅各有攸堅民以不虞德懷其內險難其外王公
設險而承以盤蓋昔在上世有殷有夏癸辛不德而設
夫險阻湯武爰征而莫遏莫禦作君之危不可德少而
城溝伊保不可德希而城溝是依唐虞長德而四海永
懷秦恢長城而天下畔乖尉臣司城敢告作階

上林苑令箴

芒芒大田芄芄作穀山有征陸野有林麓夷原汚藪禽
獸攸伏魚鱉以時芻蕘咸殖國以殷富民以家給昔在
帝羿共田徑游弧矢是尚而射夫封豬不顧於愆卒造
後憂是以田獲三驅不可過差塵鹿攸伏不如德至衡
臣司虞敢告執指

司空箴

普彼坤靈侔天作則分制五服劃為萬國乃立地官空
惟是職茫茫九州都鄙盈區綱以羣牧綴以方侯烈烈
雋又翼翼王臣臣當其官官宜其人九一之政七賦以
均昔在季葉班祿遺賢稽克充朝而象恭滔天匪人斯
力匪政斯勅流貨市寵而苞苴是鬻王路斯浮孰不傾
覆空臣司土敢告在側

太常箴

翼翼太常寔為宗伯穆穆靈祇寢廟奕奕稱秩元祀班

于羣神我祀既祗我粢孔蠲匪愆匪忒公尸攸宜弗祈
弗求惟德之報不矯不誣庶無罪悔昔在成湯葛爲不
吊棄禮慢祖夔子不祀楚師是虜魯人躋僖臧文不寤
文隳太室相納郤賂災降二宮用誥不禘故聖人在位
無曰我貴慢行繁祭無曰我材輕身侍巫東隣之犧牛
不如西隣麥魚秦殞望夷隱斃鍾巫常臣司宗敢告執
書

尚書箴

皇皇聖哲允勅百工命作齋慄龍爲納言是機是密出
入朕命王之喉舌獻善宣美而讒說是折我視云明我
聽云聰載夙載夜惟允惟恭故君子在室出言如風止
於民人渙其大號而萬國平信春秋譏漏言易爾不
則失臣兌吉其和巽吝其頽書稱其剛申申厥鄰昔
尚權詐官非其人符璽竊發而扶蘇殞身一姦愆命七
廟爲墟威福同門牀上維辜書臣司命敢告侍隅

博士箴

洋洋三代典禮是修畫爲辟雍國有學校侯有泮宮各
有攸教德用不陵昔在文王經啓其軌勗子德音而思
皇多士多士作楨惟周以寧國人興讓虞芮質成公劉
挹行潦而濁亂斯清官操其業士執其經昔聖人之綏
俗莫美於施化故孔子觀夫大學而知爲王之易易大
舜南面無爲而衽席平還師階級之間三苗以懷秦作
無道斬决天紀漫彼王迹而坑夫術士詩書是泯家言
是守俎豆不陳而顛其社稷故仲尼不對問陳而胡篋

是遵原伯非學而閔子知周之不振儒臣司典敢告在
賓

廣文選卷第六十九

江都葛澗校

廣文選卷第七十

明通議大夫都察院右副都御史大庾劉節廣

箴下

太尉諸箴 四首

崔亭伯

天官冢宰庶幾之師師錫有帝命虞作尉爰叶台極安
平國域制軍詰禁王旅惟式九州用綬群公咸治干戈
載戢宿纏其紀上之云據下之云戴荷非其人斃我帝
載昔周人思文公而召南詠甘棠昆吾隆夏伊摯盛商
季世頗僻禮用不匡無曰我強莫余敢喪無曰我大輕
戰好殺紂師百萬卒以不艾宰臣司馬敢告在際

河南尹箴

崔亭伯

茫茫天區畫冀為京商邑翼翼四方是營唐虞商周河

洛是居成王郊廓以處鶉墟諸夏勁強是從是橫徹我
牆屋而師尹不匡霸奪其惟守器以分圖籍遷齊九鼎
入秦

司徒箴

崔亭伯

天鑒在下仁德是興乃立司徒亂茲黎烝茫茫庶域率
土祁祁人具爾瞻四方是維乾乾夕惕靡怠靡違敬敷
五教九德咸事嗇人用章黔疇是富無曰余恃忘予爾
輔無曰余聖以忽執政匪用其良乃荒厥命庶績不怡
疾于爾祿豐其折右而鼎覆其餽書歌收肱詩刺南山
尹氏不堪國度斯憊徒臣司衆敢告執藩

大理箴

崔亭伯

邈矣臯陶翊唐作士設為犴狴九刑允理如石之平如
淵之清三槐九棘以質以聽罪人斯殛凶旅斯并熙又
帝載旁施作明昔在仲尼哀矜聖人子罕禮刑衛人釋
艱釋之其忠勲亮孝文於公哀寡定國廣門夙哉邈矣
舊訓不遵主慢臣驕虐用其民賞以崇欲刑以肆忿紂
作炮烙周人滅殷夏用淫刑湯誓其軍衛殃酷烈卒殞
于秦不疑加害禍不反身嗟茲大理慎于爾官賞不可
不思斷不可不虔或有忠能被害或有老而見殘吳沉
伍胥殷剖比干莫遂爾情是截是刑無遂爾心以速以
殛天鑒在顏無細不錄福善災惡其效甚速理臣司律
敢告執獄

東觀諸箴

崔子玉

洋洋東觀古之史官二指五鼎庶幾不貫左書君行右

記其言辛尹顧訪文武明官倚相見寶荆國以安何以
季世咆哮不處在強奮矯而戮彼逢于衛巫監謗國莫
敢言狐突見斥淖齒見殘焚文坑儒羸及爲漢巫蠱之
毒殘者數萬嗟嗟後王曷不斯鑒是以明哲先識擇木
而處夏終殷摯周聃晉忝或笑或泣抱籍遁走三葉請
公果喪厥緒宗廟隨夷遠之荆楚麥秀之歌億載不腐
夷臣司藝敢告侍後

尚書箴

崔子玉

龍作納言帝命惟允山甫翼周實司喉吻赫赫禁臺萬
邦所庭無曰我平而慢爾衡無曰我審而怠爾明四岳
阿緜績用不成虞登八元五教聿清舉以無私乃忝服
榮正直是與伊道之經先民匪懈末世流聲君子下問

敢告侍庭

司隸校尉箴

崔子玉

煌煌古制分割五服翼翼封畿四方之極牧監匡設是
謂王國大漢通變崇弘簡易吞舟之網以濟難阨自時
厥後或慢或遲繡衣四出樞起宮闈江克作亂辱于戾
園率隸掘壘以詰其姦既定既寧爰遂其官俾督京甸
時推鷹鷂必正必忒國之司直乃回乃邪寔爲讒慝毀
於貞賢悔其何及昔唐虞晏晏庶績以熙羸氏慘慘怨
毒用滋是故履上位者無云我貴苟任激訐平陽玄默
以式百辟畫一之歌豈猶遐歎使臣司隸敢告執役

外戚箴

崔子瑋

赫赫外戚華寵煌煌昔在帝舜德降英皇周興二母有

華崇湯宣王晏起姜后脫簪齊桓好樂衛姬不音皆輔
王以禮揀君以仁達才進善以義濟身爰暨哀葉漸已
頽虧貫魚不敘九御差池晉國之難禍起於麗惟家之
索牝雞之晨專權擅愛顯已蔽人陵長閭舊圯剝至親
並后匹嫡淫女斃陳匪賢是上番為司徒荷爵負乘采
食名都詩人是刺德用不恤暴辛惑婦拒諫自孤蝠蛇
其心縱毒不辜諸父是殺孕子是刺天怒地忿人謀鬼
圖甲子昧爽身首分離初為天子後為人螭非但耽色
母后尤然不相率以禮而競獎以權先笑後號卒以辱
殘家國泯絕宗廟燒燔未嬉喪夏襄姒斃周妲已亡殷
趙靈沙丘戚姬人豕呂宗以敗陳后作巫卒死於外霍
欲鳩子身乃權廢故曰無謂我貴天將爾摧無恃常好
奏名歌新聲踰激楚妙妓絕唱阿玄鶴降浮雲鱗魚躍
中河墨翟且停車展季猶盜左淳于前行酒雍門坐相
和孟公結重關賓客不得蹉一雅來何遲耳熱眼中花
盤按互交錯坐席咸喧譁簪珥或墮洛冠冕皆傾邪酣
飲終日夜明燈繼朝霞絕纓尚不尤安能復顧他留連
彌信宿此歡難可過人生若汗寄年時忽蹉跎促促朝
露期榮樂遽幾何念此腸中悲涕下自滂沱但畏執法
吏禮防且切蹉

思歸引

傅休奕

景龍飛御天威聰鑒玄察勤與神明協機從之者顯逆
之者滅夷文教敷武功勳昔被四海萬邦望風莫不來
綏聖德潛斷先天弗違弗違祥享世末長猛以致竟道

化光赤明明祚隆無疆帝績惟期有命既集崇此洪基

董逃行歷九秋篇

傅休奕

歷九秋兮三春遺貴客遠賓顧多君心所親乃命妙

妓才人炳若日月星辰序金壘兮玉觴賓主遞起寫

行杯若飛電絕光交觴以卮結裳慷慨歡笑萬方其奏

新詩兮夫若爛然虎變匪文渾如天地未分齊謳楚舞

紛紛歌聲上激青雲其躬八音兮異倫奇聲靡靡每新

微披素齒丹唇逸響飛溥梁塵精爽眇眇入神其坐咸

醉兮沾歡引樽促席臨軒進爵獻壽翻翻千秋要君一

言願愛不移若山其君恩愛兮不竭譬若朝日夕月此

景萬里不絕長保初醮結髮何憂坐胡越其攜弱手兮

金環上游飛閣雲間穆若鴛鳳雥鸞還幸蘭房自安娛

大禹拜承昌言癸辛暴戾虐及于天逢于周厲慢德不

蠲煦煦胥讒人謗乃作不顧厥愆是討是格庶類不堪

流之彘宅防人之口譬諸防川豈不速止潰乃滄潏潏

溪尚塞言擁為賊默默之患用顛厥國諫臣司議敢告

執翼

大師箴

嵇叔夜

浩浩太素陽曜陰凝二儀陶化人倫肇典厥初冥昧不

慮不營欲以物開患以事成犯機觸害智不救生宗長

歸仁自然之情故君道自然必託賢明茫茫在昔罔或

不寧赫胥既往紹以皇義默靜無文大朴未虧萬物熙

熙不天不離爰及唐虞猶篤其緒體資易簡應天順矩

絺褐其裳土木其宇物或失性懼若在予疇咨熙載終

禪舜禹夫統之者勞仰之者逸至人重身棄而不恤故
子州稱茨石戶棄梓許由鞠躬辭長九州先王仁愛愍
世憂時哀萬物之將頽然後莅之下逮德衰大道沉淪
智惠日用漸私其親懼物乖離肇仁利巧愈競繁禮屢
陳刑教爭施天性喪貞季世陵遲繼體承資憑尊恃勢
不友不師宰割天下以奉其私故君位益侈巨路生心
竭智謀國不吝灰沉賞罰雖存莫勸莫禁若乃驕盈肆
志阻兵擅權矜威縱虐禍蒙丘山刑本懲暴今以脅賢
昔爲天下今爲一身下疾其上君猜其臣喪亂弘多國
乃殞顛故殷辛不道首綴素旗周朝敗度堯人是謀楚
靈極暴乾溪潰叛晉厲殘虐藥作難主父棄禮殼胎不
宰秦皇荼毒禍流四海是以亡國繼踵今古相承醜彼
權滅而襲其亡徵初安若山後敗如崩臨刃振鋒悔何
所增故居帝王者無曰我尊慢爾德音無曰我強肆干
驕淫棄彼佞倖納此逆顏諛言順耳染德生患悠悠庶
類我控我告唯賢是授何必親戚順乃造好民實胥效
治亂之原豈無昌教穆穆天子思問其僣虚心導人允
求謹言師臣司訓敢告在前

乘輿箴

潘正叔

易稱有天地然後有人倫有父子然後有君臣傳曰大
者天地其次君臣然君臣父子之道天地人倫之本未
有以先之者也故天生蒸人而樹之君使司牧之將以
導群生之性而理物之情豈以寵一人之身極無量之
欲如斯而已哉夫古之爲君者無欲而至公故有茅茨

土階之儉而後之爲君有欲而自利故有瑤臺瓊室之
多無欲者天下其推之有欲者天下共爭之推之之極
雖禪代猶脫屣爭之之極雖刳殺而不避故曰天下非
一人之天下乃天下之天下安可求而得辭而已者乎
夫修者已而化諸人出乎邇而見乎遠者言行之謂也
故人主所患莫甚於不知其過而所美莫美於好聞其
過若有君於此而曰子必無過唯其言而莫之違斯孔
子所謂其度幾乎一言而喪國者也蓋君子之過如日
月之蝕過也人皆見之更也人皆仰之雖以堯舜湯武
之盛必有誹謗之木敢諫之鼓盤杆之銘無諱之史所
以閑其邪僻而納諸正道其自維持如此之備故箴規
之興將以救過補闕然猶依違諷諭使言之者無罪聞
之者足以自誠先儒既援古義舉內外之殊而高祖亦
序六官論成敗之要義正辭約又盡善矣自虞人箴以
至揚于百官非准規其所司誠欲人主斟酌其得失焉
春秋傳曰命百官箴王闕則亦天子之事也尼以爲王
者膺受命之期當神器之運摠萬機而撫四海簡群才
而審所授孜孜於得人汲汲於聞過雖廷爭面折猶將
祈請而求焉至於箴規諫之順者曷爲獨闕之哉是以
不量其學陋思淺因負擔之餘嘗試撰而述之不敢斥
至尊之號故以乘輿日篇蓋帝王之事至天而古今之
變至衆文繁而義詭意高而辭野將欲希企前賢髮髯
崇軌譬猶丘垤之望華岱恒星之繫日月也其不逮
明矣元元遂初芒芒太始清濁同流玄黃錯跣上下弗

形尊卑靡紀赫胥悠哉大庭尚矣皇極啓建兩儀既分
燹倫未序萬邦已紛國事明王家奉嚴君各有攸尊德
用不勤義農已降暨于夏辰或禪或傳乃質乃文大上
無名不知有之仁義不存而人歸孝慈無爲無執何欲
何思忠信之薄禮刑實滋既與既畏以侮以欺作誓作
盟而人始叛疑煌煌四海藹藹萬乘匪誓焉憑左輔右
弼前疑後丞一日萬機業業兢兢夫出其言善則千里
是應而莫余違亦喪邦有微樞機之動式以廢興殷鑒
不遠若之何勿徵且厚味腊毒豐屋生災辛作瑋室而
夏興瑤臺糟丘酒池象箸玉杯厥肴伊何龍肝豹胎淮
此哲婦職爲亂階殷用喪師夏亦不恢是以帝堯在位
茅茨不剪周文日昃昧旦丕顯夫德輶如毛而或舉之
者鮮故漢有慙德武未盡善下世道衰末俗化淺耽樂
逸遊荒淫沈湎不式古訓而好是佞辯不遵王路而覆
車是踐成敗之效載在先典匪唯陵夷厥世用殄故曰
樹君如之何將人是司牧視之猶傷而知其寒燠故能
撫之斯柔而敦之斯睦無遠不懷靡思不服夫豈厭縱
一人而玩其耳目內迷聲色外荒馳逐不修政事而終
於顛覆昔唐氏授舜舜亦命禹受終納祖丕承天序放
桀惟湯剋殷伊武故禪代非一姓社稷無常主四嶽三
塗九州之阻彭蠡洞庭殷商之旅虞夏之降非由尺土
而紂之百剋卒於絕緒故王者無親唯在擇人傾蓋惟
舊白首乃新望由鈞夫伊起有幸負鼎鼓刀而謀合聖
神夫豈借官左右而取介近臣蓋有國有家者莫云我

聰或此面從莫謂我智聽受木易其言美疾豈不為累
由夷逃寵遠於所處奈何人主位極則侈知人則哲惟
帝所難唐朝既遷四族作奸周室既隆而管蔡不虔匪
我二聖孰弭斯患若九德咸受雋又在官君非臣莫治
臣非君莫安故書三書哉而易貴金蘭有皇司國敢告
納言

尚書箴

傅休奕

明明王範制為九服君執常道臣有定職各有攸司又
用不慝貴無常尊賤不指卑不明厥德國用顛危昔舜
舉咎繇而雋又在官湯舉阿衡而不仁流屏且表正而
象平日夕而景側處喉舌者患銓衡之無常不慮於不
明故曰無謂隱微廢公任私無好自尊違衆取怨以公
言之君子無親無疎縱心六倫修己以道弘道以
貴好爵書慎官人官不可妄授職不可闕受能者考之
致福不能考之怨者衡巨司書敢告左右

學

李伯仁

老子云絕仁義家復孝慈豈仁義之道絕然後孝慈
乃生哉若夫仁義者寡而利仁義者衆也道德喪
而仁義彰仁義彰而名利作禮教之弊直在茲也先王
以道德之不行故以仁義化之行仁義之不篤故以禮
律檢之檢之彌繁而偽亦愈廣老莊是乃明無為之益
塞爭欲之門夫極靈智之妙總會通之和者莫尚乎聖
人革二代之弘制垂千載之遺風則非聖不立然則聖
人之在世吐言則為訓辭莅事則為物軌運通則與時

隆理喪則與世弊矣是以大爲之論以標其旨物必有
宗事必有主寄責於聖人而遺累平陳迹也故化之以
絕聖棄智鎮之以無名之樸聖教救其未老莊明其本
本末之塗殊而爲教一也人之迷也其日久矣見刑者
衆及道者歎不覩千仞之門而逐適物之迹逐迹逾篤
離本逾遠遂使華端與薄俗俱興妙緒與淳風並絕所
以聖人長潛而迹未嘗滅矣懼後進或其如此將越禮
棄學而希無爲之風見義教之殺而不覩其隆矣畧言
所懷以補其闕引道家之弘旨會世教之適當義不違
本言不流放庶以祛困蒙之蔽悟一往之惑乎

茫茫太初悠悠鴻荒蚩蚩萬累與道兼忘聖迹未顯賢
名不彰怡此鼓腹率我猖狂資生旣廣群塗思通開寶
師明匪余求蒙遺已濟物而天下爲公大庭唱其
宏贊立位時成離暉大觀澤洽兩濡化流風散比屋同
塵而人罔憊亂爰暨中古哲王胥承質文代作禮統迭
興事藉用以繁化因阻而凝動非性擾靜豈神澄名之
攸彰道之攸廢乃損所隆乃崇所替刑作由於德衰三
辟興乎叔世旣敦旣誘乃矯乃厲敦亦旣脩矯亦旣深
彫琢生文抑揚成音群能騁技衆巧竭心野無陸馬山
無散林風罔不動化罔不移人之矢德反正作奇乃放
欲以越禮不知希競之爲病違彼夷塗而遵此險徑狡
兔陵岡游魚遁川至曠深妙大象幽玄棄餌取罝而責
功蹄筌失統喪歸而寄旨忘言政異徵亂拔本塞源遁
迹末日尋響窮年刻意離性而失其常然世有險夷運

有通圯損益適時升降惟理道不可以一日廢亦不可
以一朝擬禮不可爲千載制亦不可以當年止非仁無
以長物非義無以齊耻仁義固不可遠去其害仁義者
而已力行猶懼不逮希企邈以遠矣室有善言應在十
里況乎行止復禮克已風人司箴敬貽君子

尚書箴

張茂先

明明先王開國成家作制垂憲仰觀列曜俯今百官政
用罔憊昔舜納大麓七政以齊內成外平而風雨不迷
仲山翼周靡剛靡柔補我袞闕正我王猷王猷允塞而
四海咸休雖曰聖明必資良材無曰我智官不任能發
言如絲其出成綸千里之應樞機在身世季道缺天綱
縱替旣無老成改舊法制法制不修不長厥齊尚百司
臺敢言侍衛

廣文選卷第七十

江都葛顯校

廣文選卷第七十一

明通議大夫都察院右副都御史大庾劉節廣

銘上

沛泗水亭銘

班孟堅

皇皇聖漢非自沛豐乾降著符精感赤龍承旆流裔襲
 唐末風寸天尺土無族斯亭建號軍基維以沛公揚威
 斬蛇金精摧傷涉關陵郊保獲秦王應門造勢斗壁納
 忠天期乘祚受爵漢中勒陳東征剗擒三秦靈威神佑
 鴻溝是乘漢軍改歌楚衆易心誅項討羽諸夏以康陳
 張畫策蕭勃翼終出爵褒賢列十封功炎火之德彌光
 以嗣源清流潔本盛末榮叙將十八替述股肱休勛顯
 祚未末無疆國寧家安我君是升根生葉茂舊邑是仍

於皇舊亭苗嗣是永天之福祐萬年是興

十八侯銘

班孟堅

鄼侯蕭何

眈眈相國弘策不追御國維綱秉統樞機文昌四友漢有蕭何序功第一受封于鄼

將軍舞陽侯樊噲

訖訖將軍威蓋不當操盾干鈞拔主項堂漢興破楚矯矯忠良卒為丞相帝室以康

將軍留侯張良

赫赫將軍受兵黃石規圖勝負不出帷幄命惠瞻仰安全正朔國師是封光營舊宅

太尉絳侯周勃

懿懿太尉悼原朴誠輔翼受命應節御營歷位卿相士國兼并見危致命社稷以寧

將軍平陽侯曹參

蹇蹇相國允忠克誠臨危處險安而匡傾興伐之際濟主立名身履國土秉御乾楨

丞相戶牖侯陳平

洋洋丞相勢譎師旅擾攘楚魏為漢謀主六奇解厄揚名于後

南宮侯張敖

堂堂張敖耳之遺萌以誠佐國序跡建忠功成德立襲封南宮垂號萬春永保無疆

衛尉曲陽侯酈商

行衛尉德行循規遭兄食其隕歿於齊橫耻愧景烈
鎮自獻金紫褒表萬世不刊

將軍潁陽侯灌嬰

煌煌將軍輔漢久長威震呂氏姦惡不揚寇攘殄盡躬
運代王功顯帝室萬世益章

將軍汝陰侯夏侯嬰

斌將軍鷹武是揚內康王室外鎮四方諸夏又安流
要荒聲騁海內苗嗣紀功

將軍陽陵侯傅寬

休將軍如虎如羆御師勦陳破敵以威靈全曜楚火
飛鳥飛將命仗節功績永垂

將軍信武侯靳歙

斤斤將軍忠信孔雅出身六師十二四旅折衝扞難遂
寧天下金龜章德建號傳後

丞相安國侯王陵

明明丞相天賦庭直剛德正行不枉不曲功業成著榮
顯食邑距呂奉主昭然不惑

將軍襄平侯韓信

桓桓將軍輔主克征奉使全辟身出項營序功差德履
讓以平轉北而遊雲中以傾

將軍棘津侯陳武

嚴嚴將軍帶武佩威御雄乘險難困不違仇滅主定四
海是楨功成食土德被遐邇

曲成侯蠱達

晏晏曲成輿從龍騰安危從王赤曜以升赫赫皇皇道
彌光嗣惟德御國流及後嗣

御史大夫汾陰侯周昌

肅肅御史以武以文相趨距呂志安君身微詣行所如
意不全天秩邑土勛乃永存

將軍青陽侯王吸

邑邑將軍育養丞徒建謀正直行不匿邪入軍討敵頂
定天都佩雀雙印百里為家

西嶽華山堂闕銘

張昶

易曰天地定位山澤通氣然山莫尊於嶽澤莫盛於瀆
山嶽有五而華處其一瀆有四而河在其數其靈也至
矣聖人廢興必有其應故岱山石立中宗繼統太華授

璧秦胡絕緒白魚入舟姬武建業寶珎出水子朝喪位
布伍方則處其四列三條則居其中若廣袤奇蟲山經
有紀矣是以帝王巡狩親五嶽而告至觀方后而考禮
故經有望秩之禋典有生殖之祀蓋所以崇山川而報
功也四海一統天子秉其禮諸侯力政疆國攝其祭奉
其邑曰華陰也久矣乃紀於禹貢而分秦晉之境奉鄙
晉之西則曰陰晉邊秦之東則曰寧秦邑既遷徒禮亦
如之二國力爭以奉以祭具城險固基趾猶存故老之
言未殞於民也逮至大漢受命克亂不愆不忘舊名是
復率禮不越故祀是尊歷堊增修處祭文備一禱三祀
終歲而四以迄乎今而世宗入經集靈之宮於其下想
喬松之壽是遊是憩郡國方二自遠而至者充巖塞厓

鄉邑巫覡宗祀乎其中者盈谷盈谿咸有浮飄之志偷
悅之色必雲霄之路可升而越吳繁昌之福可降而致
也故殖財之實黃土自出令德之珍卿相是毓匪惟嵩
高降生申甫此亦自焉夫有所興必先廢之故殷宗周
宣以衰致盛是時也工業中缺大化陵遲郡縣既毀財
匱禮乏庭朝傾壞壇場蕪穢祭祀之禮有缺焉於是鎮
遠將軍領北地太守閩卿亭侯段君諱煨字忠明自武
威古此土憑託河華一靈是與故能以昭烈之德享上
將之尊御命持重屯斯寄國討叛柔服威懷是示群兇
既除郡縣集寧家給人足戶有樂生之歡朝釋西顧之
慮而懷關中之恃雖昔蕭相輔佐之功功冠群后弗以
加也遂解甲休士陣而不戰以逸其力修飾享廟壇場
之位荒而後辟禮廢而復興又造祠堂表以參闕建神
路之端首觀壯麗乎孔徹然后旅祀祈請既有常處雖
雨雪衣而禮不廢於是邑之士女咸曰宜之乃建碑刻
石垂示後裔其辭曰於穆堂闕昭明經之營之不
日而成匪奢匪儉惟德是程匪豐匪約惟禮是榮虔恭
禋祀黍稷芬馨神具醉止降福穰穰

孟津銘

李伯仁

洋洋河水赴宗于海經自中州龍國所在黃函白神赤
符以信黃在周武集會孟津魚入王舟乃徃克殷大漢
承緒懷階遐鄰邦事來濟各貢厥珍

洛銘

李伯仁

洛其熊耳東流會集夏禹導疏經于洛也玄龜赤字漢

符是立帝都通路建國南鄉萬乘終濟造舟為梁三都
五州百篚萬方廣視遠聽審任賢良元首昭明庶類是
康

函谷關銘

李伯仁

函谷險要襟帶喉咽尹從李老留作二篇孟嘗離秦奔
驚東征夜造稽疑譎以雞鳴范睢將入自盛以囊元鼎
革移錯之新安舍彼西阻東即高原長墉重關閉固不
諭簡易易從與乾合符

太平山銘

孫興公

崑莪太平峻踰華霍秀嶺樊縕奇峯挺嶸上干翠霞下
籠丹壑有士冥遊默往奇託肅形枯林映心幽漠亦既
觀止渙焉融滯懸棟翠微飛宇雲際重巒蹇產迴溪縈
帶被以青松灑以素瀨流風佇芳翔雲停幽

凌煙樓銘

鮑明遠

臣聞憑颯薦響唱微效長垂波鑿景功少致深是以水
臺築乎魏邑鳳閣起於漢京皆所以贊生通志感悅幽
情者也伏見所製凌煙樓樓置崇迥近瞰平寂即秀神
臯因基地勢東臨吳甸西眺楚關奔江未寫鱗嶺相葺
重樹窮天通原盡日悲積陳右賞絕舊年誠可以暉曠
高明藻撤遠心矣夫識緣感傾事待言彰匪言匪述綿
世罔傳敢作銘曰巖巖崇樓藐藐層隅階基天削戶牖
雲區瞰江列楹望景延除積清風露合綵煙塗俯窺淮
海俛眺荆吳我王結駕藻思神居宜此萬春修靈所扶

桐栢山金庭館碑銘

沈休文

夫生靈為貴有識斯同道天云及終天莫反故仙學之
祕上聖攸尊啓玉笈之幽文貽金壇之妙訣駐景濛谷
還光上枝吐吸煙霞變練丹液出沒無方升降自己下
栖洞室上賓羣帝覩靈岳之驟啓見滄波之屢竭望玄
州而駿驅指蓬山而未驚芝蓋三重駕螭龍之蜿蜒雲
車萬乘載旗旆之逶迤此蓋栖靈五嶽未暨夫三清者
也老夫上玄奧遠言象斯絕金簡玉字之書玄霜降雪
之寶俗士所不能窺學徒不敢輕慕且禁誓嚴重志業
艱劬自非天稟上才未易可擬自惟凡劣識鑿鮮方徒
抱出俗之願而無致遠之力早尚幽栖屏棄情累留愛
巖壑託分魚鳥塗愈遠而靡倦年既老而不衰高宗明
皇帝以上聖之德結宗玄之念忘其非薄曲賜提引示

一不固乞還山在慈汝南縣境固非息心之地
歷復蒙繫維永泰元年方遂初願遂遠出天台定
茲嶺所憇之山實惟桐栢實靈聖之下都五縣之餘地
仰出星河上參倒景高崖萬沓邃澗千迴因高建壇憑
巖考室飭降神之宇置朝禮之地桐栢所在厥號金庭
事曷靈圖因以名館聖上曲降幽情留信彌密置道士
十人用祈嘉祉越以不才首膺斯任永棄人群竄景窮
三經懇志於玄都望霄容於雲路仰宣國靈介茲是福
延吉祥於清廟納萬壽於神躬又願道無不懷澤無不
至幽荒屬膝戎貊群賴息鼓輟烽守在海外因此自
無遂微誠日久艱鄙自強不已翹心屬念晚卧晨興
正陽於停午念孔神於中夜將三芝而延佇飛九丹而

冥息乘鳧輕舉留鳥忘歸以茲丹穀表之玄極無日在
上日鑿非遠銘石靈館以旌厥心其辭曰道無不在若
存若亡於惟上學理妙群方用之日損言則非常儵焉
靈化羽變霓裳九重崑崙三山璀璨日為車馬芝成宮
觀虹旂拂月龍輶漸漢萬春方華千齡始旦伊余菲薄
竊慕隱淪尋師講道結友問津東採震澤西遊漢濱依
係靈眷髣髴幽人帝明紹歷惟皇纂位屬心鼎湖脫屣
神器降命凡底仰祈靈祕瞻彼高山興言覆篲啓基桐
栢厥號金庭喬峯迥峭肇漢分星臨雲置壇駕岳開櫺
澗塗蹇奎林祈葱青誰謂應遠神道微密慶集宮闈祥
流卒畢其久如地其恒如日壽同南山與天無卒吏生
變煉外示無功少君飛轉密與神通因資假力輕舉騰
空庶憑嘉誘永濟微躬

廣文選卷第七十一

江都葛澗校

廣文選卷第七十二

廣文選卷第七十二

明通議大夫都察院右副都御史大庾劉節廣

銘下

器物銘十八首

周武王

席銘

安樂必敬無行可悔一及一側亦不可以忘所監不遠
視爾所代

机銘

皇皇惟敬口口生敬口口生敬口口生敬

鑑銘

見爾前慮爾後

盥盤銘

與其溺於人也寧溺於淵溺於淵則不可游也溺於人不
可救也

楹銘

母曰胡殘其禍將然母曰胡寧其禍將大母曰胡傷其
禍將長

杖銘

惡乎危於念慮惡乎失道於嗜慾惡乎相忘於富貴

帶銘

火滅修容慎戒必共共則壽

履銘

慎之勞勞則富

錫豆銘

食自杖食自杖戒之憍憍則逃

戶銘

夫名難得而易失無勤弗志而曰我知之乎無勤弗及
而曰我杖之乎擾蛆以泥之若風將至必先搖搖雖有
聖人不能為謀也

牖銘

隨天之時以地之財敬祀皇天敬以先時

劍銘

帶之以為服動必行德行德則興倍德則崩

弓銘

屈伸之義發之行之無忘自過

矛銘

造乎造乎少問弗忍終身之羞予一人所聞以戒後世子孫

衣銘

桑蠶苦女工難得新損故後必寒

鏡銘

以鑑自照者見形容以人自照者見吉凶

觴銘

樂極則悲沈湎致非社稷為危

金人銘

古之慎言人也戒之哉無多言多言多敗無多言多事多患安樂必戒無行所悔勿謂何傷其禍將長勿謂何害其禍將大勿謂不聞神將伺文滔滔不滅炎炎若何

涓涓不壅終成江河綿綿不絕或成網羅毫末不割將尋斧柯誠能慎之福之垠也口是何傷禍之門也強梁者不得其死好勝者必遇其敵盜憎主人民怨其上君子知天下之不可上也故下之知衆人之不可先也故後之温恭慎德使人慕之執雌持下人莫踰之人皆趨彼我獨守此人皆惑之我獨不徒內藏我知不與人論技我雖尊高人莫害我夫江湖長百谷者以其卑下也天道無親常與善人戒之哉

鼎銘

正考父

一命而僂再命而偃三命而俯循牆而走亦莫余敢侮體於是鬻於是以糊余口

鼎銘

孔悝

六月丁亥公假于太廟公曰叔舅乃祖莊叔左右成公成公乃命莊叔隨難於漢陽即宮于宗周奔走無射啓右獻公獻公乃命成叔纂乃祖服乃考文叔興舊考欲作率慶士躬恤衛國其勤公家夙夜不懈民咸曰休哉公曰叔舅予汝銘若纂乃孝服慳拜稽首曰對揚以辟之勤大命施行烝彝鼎

杖銘

劉子政

歷危乘險匪杖不行年耆力竭匪杖不彊有秋不任顛跌誰怨有士不用害何足言都蔑雖甘殆不可杖佞人悅已亦不可相杖必取便不必用味士必任賢何必取貴

仲山甫鼎銘

崔亭伯

鬲耳革其行塞雉膏不食方雨虧悔終吉有福足勝其任公餗乃珍於高思危在滿戒溢可以末年天之大理

車左銘

傅武仲

虞氏作車取象璿衡君子建左法天之陽正位受綏車不內顧塵不出軌鸞以節步彼言不疾彼指不躬玄覽于道求思厥中

車右銘

傅武仲

擇御卜右採德用良詢納耆老于我是匡惟賢是師惟道是式箴闕旅賁內顧自勅匪望其度匪愆其則越戒敦約禮以華國

漏刻銘

李伯仁

昔在先聖配天垂則仰釐七曜俯順坤德力建日官俾

立漏刻昏明既序景曜不惑唐命義和敬授人時懸象
著明序以崇熙季末不虔德衰于茲挈壺失職刺流在
詩聖哲稽古帝則是欽尺璧非寶重此寸陰昧且不顯
敬聽漏音思我王度如玉如金

座右銘

嚴君平

夫疾形不能遁影大音不能掩響默然託蔭則影響無
因常體卑弱則禍患無萌口舌者禍患之門滅身之斧
言語者天命之屬形骸之部出失則患入言失則亡身
是以聖人當言而懷發言而憂如赴水火履危臨深有
不得已當而後言嗜慾者潰腹之矛貨利者喪身之仇
嫉妬者亡驅之害讒佞者刎頸之兵殘酷者絕世之殃
陷害者滅嗣之場淫戲者殞家之壑嗜酒者窮餒之藪
忠孝者富貴之門節儉者不竭之源吾日三省傳生後
嗣萬世勿遺

五熟釜銘

魏文帝

於赫有魏作漢藩輔厥相維鐘寶幹心齊靖共夙夜匪
遑安處百僚師師皆茲矩度

承露盤銘

曹子建

岩岩承露峻極太清神君礪礪洪基嶽停下潛醴泉上
受雲英和氣四充翔風所經匪我明君孰能經營近歷
躔度三光朗明殊俗歸義祥瑞混并鸞鳳晨棲甘露霄
零神物攸協高而不傾奉天戴魏恭統神器固若露盤
長存未貴賢聖繼跡奕世明德不忝先功保茲皇極垂
作億兆未荷天秩

無射鍾銘

王仲宣

有魏匡國成功允章格于上下光于四方休徵時序人
悅時康造茲衡鍾有命自皇三以紀之六以平之厥量
孔嘉厥齊孔時音聲和協人德同熙聽之無數用以啓
期

反金人銘

孫子荆

晉太廟有石人焉大張其口而書其曾曰我古之多言
人也無少言無少事少言少事則後生何述焉夫唯立
言名乃長又胡為塊然生鉗其口凡夫貪財烈士殉名
盜跖為濁夷柳為清鮑肆為臭蘭闡為聲莫貴澄清莫
賤滓濊二者言異歸於一會堯懸諫鼓舜立謗木聽采
風謠惟日不足道潤群生化隆比屋末葉陵遲禮教彌
衰奉旨則順忤意則違時好細腰宮中皆飢時悅廣額
不作細眉逆龍之鱗必陷斯機括囊無咎乃免誅夷顛
覆厥德可為傷悲斯可用戒無妄之時假說周廟於言
為蚩是以君子追而改之

廣文選卷第七十二

江都葛澗校

廣文選卷第七十三

明通議大夫都察院右副都御史大庾劉節廣

誄

孔子誄

魯哀公

天不遺耆老莫相予位焉嗚呼哀哉尼父

又

昊天不吊不憝遺一老俾屏余一人以在位罔罔余在
疚嗚呼哀哉尼父

元后誄

楊子雲

新室文母太后崩天下哀痛號哭涕泗思慕功德咸上
柩誄之銘三

惟我有新室文母聖明自太后在
出黃帝西陵昌意實

生高陽純德帝孝閔也帝位禪受伊唐爰初
胙土陳田三王營相厥宇度河濶旁沙麓之靈太陰之
精天生聖主發有聖祖合二靈配元生成孝順皇姑
承家尚莊內則經板後烈不光肇初酌先天命是將兆
徵顯見新都書龍漢成既終禮歸匪生哀帝承祚惟離
典經尚是言異大命我區厥年天隕大終不盈文母覽
之千載不傾博選大智新都三衛明聖作佐與圖國難
以度厄運微立中山庶其可憐博采淑女備其婦娣觀
禮高禱祈廟編繼靡格匪天靡動匪地穆穆明明昭事
上帝弘漢祖考夙夜匪懈興滅繼絕博立侯王親睦庶
族昭穆序嗣帝致友屬靡有遺荒咸被祚慶冀以金火
赤仍有央勉進大聖上下兼該羣祥眾瑞正我黃來火
德將滅惟后于斯天之所壞人不敵支哀平天折百
分離祖宗之愆終其不全天命有託謫在于前屬遭不
造榮極而遷皇天眷命黃虞之孫歷世運移屬在聖新
代于漢劉受祚于天漢祖承命赤傳于卜攝帝受禪立
為真皇允受厥中以安黎眾漢廟黜廢移定安公皇皇
靈祖惟若孔臧降茲珪璧命服有常為新帝母鴻德不
忘欽德伊何奉命是行菲薄服食神祇是崇尊不虛統
惟祇惟庸隆循人敬先民是從承天祇家允恭虔恪豐
阜庶升旅力不射民于留不皇詭作別計十邑國之
是度還奉于此以處貧薄罷苑置縣築里作宅以處貧
窮哀此嫠獨起常盈倉五十萬斛為諸生儲以勸好學
志在黎元是勞是勤春巡灞澹秋臻黃山夏撫鄠杜冬

卹涇樊火射饗飲飛羽之門綏宥者幼不拘婦人刑女
歸家以宥貞信玄冥采艾搜狩上蘭寅賓出日東秩賜
谷鳴鳩拂羽戴勝降桑蠶于繭館躬筐執曲帥導群妾
咸循蠶族分繭理絲女工是勅遐邇蒙祉中外禔福自
京逮海靡不仰德成類存生秉天地經無物不理無人
不寧尊號文母與新有成世奉長壽靡墮有傾著德太
常注諸旒旌嗚呼哀哉以昭鴻名享國六十姐落而崩
四海傷懷擗踊拊心若喪考妣遏密八音嗚呼哀哉萬
方不勝德被海表彌流魂精去此昭昭就彼冥冥忽兮
不見超兮西征既作下宮不復故庭爰緘伊銘嗚呼哀
哉

明帝誄

傅武仲

惟此求平其德不回恢廓鴻績遐方是懷明明肅肅四
國順威赫赫盛漢功德巍巍躬履聖德以臨萬國仁風
弘惠雲布雨集武伏蚩尤文騰孔墨下制九州上係皇
極豐美中世垂華億載冠堯佩舜踐履五代三雍既洽
帝道繼備七經宣暢孔業淑著明德慎罰尊上師傅薄
刑厚賞惠慈仁恕明並日月無有偏照譬如北辰與天
同曜發號施令萬國震懼庠序設陳禮樂宣布璇璣所
建靡不奄有貢篚納賦如歸父母正朔永昌冠帶僭耳
四方共貫八極同軌

北海王誄

傅武仲

誄曰永平七年北海靜王薨於是境內市不交易塗無
征旅農不修畝室無女工感傷慘怛若喪厥親俯哭后

土仰朔皇旻於惟羣英列俊靜思勒銘惟王勛德是昭
是嗣存隆其實光曜其聲終始之際於斯為榮乃作誄
曰
覽視昔初若論往代有國有家籍籍攸載貴勢不驕滿
罔不溢莫能復道聲色以卒惟王建國作此藩弼撫綏
方域承翼宗室對揚休嘉光照其則温恭朝夕敦循伊
德

和帝誄

蘇孝山

天王祖登率土奄傷如何昊窮奪我聖皇恩德累代乃
作銘章其辭曰

恭惟大行配天建德陶元二化風流萬國立我蒸民宣
此儀則厥初生民三五作剛載藉之盛著於虞唐恭惟
大行爰同其光自昔何為欽明允塞恭惟大行天覆地
載無為而治冠斯往代往代崎嶇諸夏 命爰茲發號
民樂其政奄有萬國民臣咸秩大孝備矣闕宮有洳由
昔姜嫄祖妣之室本枝百世神契惟一 豫留不豫道揚
末命勞謙有終實惟其性衣不制新犀王遠屏嶺和而
行威稜上古洪澤滂流沙化沾溥不憇少留民斯何怙
獻歆成雲泣涕成雨昊天不弔喪我慈父

曹蒼舒誄

魏文帝

惟建安十有五年五月甲辰童子曹蒼舒卒嗚呼哀哉
乃作誄曰

於惟淑弟懿矣純良誕豐今膺荷天之光既哲且仁爰
柔克剛彼德之容茲義肇行猶歟公子終然允臧宜逢

介社以求無疆如何昊天雕斯俊英嗚呼哀哉惟人之
生忽若朝露役役百年重壘行暮矧爾風天十三而卒
何辜于天景命不遂兼悲增傷倅倅失氣永思長懷哀
爾罔極貽爾良妃後爾真服越以乙酉宅彼城隅增丘
峩峩寢廟渠渠姻嬖雲會之路盈衢悠悠羣司岌岌其
車傾都蕩邑爰迄爾居魂而有靈庶可以娛嗚呼哀哉

魏文帝誄

曹子建

嗚呼哀哉于時天震地駭崩山崩海揚精薄景五緯錯
行百姓吁嗟萬國悲悼若喪考妣恩過慕唐擗踊郊野
仰想窮蒼僉曰何為早世隕喪嗚呼哀哉悲夫大行忽
焉光滅未弃萬民雲往雨絕承問恍惚惛憤哽咽神鋒
抽刃欲自強斃追慕三良甘心同穴感彼南風淮以

終久借沒指景自逝考諸先記等之據言生若萍寄
惟德可論朝聞夕死孔志所存皇雖一歿天祿永延何
以述德表之素旃何以詠切宣之管絃乃作誄曰
皓皓太素兩儀始分中和產物肇有人倫爰暨三星寔
秉道真降逮五帝繼以懿純三代製作踵武之勲季嗣
不綱網漏于秦崩樂滅學儒坑禮焚二世而燬漢氏乃
因弗求古訓羸政是遵王綱帝典闕爾無聞未光幽昧
道究運遷乾坤回歷簡聖授賢乃眷大行屬以黎元龍
飛啓祚合契上玄五行定紀改號革年明明赫赫受命
于天仁風偃物德以禮宣祥惟聖質疑在幼妍庶幾六
典學不過度潛心無妄元志清冥才秀藻朗如玉之瑩
聽察無響瞻覩未形其剛如金其貞如瓊如水之潔如

砥之平爵必無私戮違無輕心鏡萬機攬照下情思良
股肱嘉昔伊呂搜揚側陋舉湯代禹拔才岩穴取士蓬
戶唯聽是索弗拘禰祖宅土之表道義是圖弗營厥險
六合是虞齊契共遵下以純民恢折規矩克紹前人科
條品制褻貶以因乘殷之輅行夏之辰金根黃屋翠葆
龍鱗紉冕崇麗衡統維新尊肅禮容矚之若神方牧妙
舉欽於恤民虎將荷節鎮彼四鄰朱旗所勦九壤被震
疇克不若孰敢不臣縣旌海表萬里無塵虜備凶微
瘴江岷摧若涸魚乾若脯鱗肅慎約貢越裳效珍修
絕域獻款內賓德儕先王功侔太古上靈降瑞
祜河龍洛龜陵波遊下平均應繩神鸞舞效艾
系風扇暑皓獸素禽飛走郊野神鍾寶
英甘露灑塗被宇靈芝冒沼朱華蔭渚回回凱風祁祁
甘雨稼穡豐登我稷我黍家佩惠君戶蒙慈父圖致太
和洽德全義將登泰山先皇作儷鐫石紀勳兼錄衆瑞
方隆封禪歸功天地賓禮百靈勳命視規望祭四嶽燎
封奉柴蕭子南郊宗祀上帝三牲既供夏禘秋嘗元侯
佐祭獻璧奉璋鸞輿幽謁龍旂太常爰迄太廟鐘鼓鐺
鐺頌德詠功八佾鏘鏘皇祖既饗烈考來享神具醉止
降茲福祥天地震蕩大行康之三辰暗昧大行光之皇
絃惟絕大行綱之神器莫統大行當之禮樂廢弛大行
張之仁義陸沈大行揚之潛龍隱鳳大行翔之䟽狄遐
康大行庄之在位七載元功仍舉將未太和絕迹三五
宜作物師長為神主壽終金石等算東父如何奄息摧

身後土俾我筑築靡瞻靡顧嗟嗟皇穹胡寧忍務嗚呼
哀哉嗣鑑吉凶體遠存亡深垂典制由之嗣王聖上處
奉是順是將乃劔玄宇基爲首陽擬迹穀林追堯慕唐
合山同陵不樹不疆塗車芻靈珠玉靡藏百神警待來
賓幽堂耕禽田獸望魂之翔於是俟大隧之致力兮練
元辰之淑禎潛萃體於梓宮馮正殿以居靈顧望嗣之
號咷兮存臨者之悲聲悼晏駕之旣往兮感容車之速
征浮飛魂於輕霄兮就黃墟以滅形背三光之昭晰兮
歸玄宅之冥冥嗟一往之不返兮痛閔闕之長扃咨遠
臣之耿耿兮成凶諱以怛驚心孤絕而靡告兮紛流涕
而交頸思恩榮以橫奔兮閱闕塞之堯崢顧衰經以輕
舉兮念關防之我嬰欲高飛而遙憇兮憚天網之遠經
遙投骨於山足兮報恩養於下庭惓拊心而自悼兮懼
施重而命輕嗟微軀之是效兮甘九死而忘生幾司命
之役籍兮先黃髮而隕零夫蓋高而察卑兮冀神明於
我聽獨鬱悒而莫告兮追顧景而憐形奏斯文以寫思
兮結翰墨以敷誠嗚呼哀哉

任誠王誄

曹子建

昔二虢佐文且奭翼武於休我王魏之元輔將崇懿迹
等號齊魯如何奄忽命不是與仁者悼沒兼彼殊類矧
我同生能不憐阻目想官墀心在平素髮髯魂神馳情
陵墓九天愛命達者徇名王雖薨徂功著丹青人誰不
沒德貴有遺乃作誄曰

幼有令質光耀珪璋孝殊閔氏義達參商温温其恭爰

柔克剛心存建業王室是匡矯矯元戎雷動雨徂橫行
燕氏威懼北胡奔虜無竄還戰高柳王率壯士常爲君
首宜究長年來保皇家如何奄忽景命不遐同盟飲淚
百寮咨嗟

吳丞相陸公誄

陸士龍

惟赤烏八年二月粵乙卯吳故使特節郢州牧左都護
丞相江陵邵侯陸公薨嗚呼哀哉皇期迭紹成命昊天
聖王作矣世有哲臣觀監在吳乃降斯神思皇我后應
運對揚穎秀崇華景逸扶桑龍輝襲極鳳鳴玉堂舉旗
清阻奮鉞夷荒悠結沈維峻極公綱將撫遠績括地九
圍皇淳爽泰昊旻疾威生民如何哲人其頽登靈在美
遺音播徽取揚元勳表之素旂乃作誄曰

濬哲我祖時文俊德玄粹納真清休載式本承慶耀
惠罔極申錫多祜本枝千億芳條遠蔭靈根茂植根條
伊何苗黃裔舜長發有祥貽我祚晉神明之緒實蕃瑰
雋和音嗣世不替碩彥明覽在下降命上玄我公初載
天嘏之純重光納照旋機授銓仰儀喬岳俯濯洪川清
耀秀穎雲翹映晨肇彼岐嶷允迪天真先心則智率意
斯仁秉彝清昧體靈協神神休載鑠九德兼和挹揮茂
朴豐淳鎮華景峻凌高玄源湧波造辰竦隆彌海廓遐
光備旣淳逸軌爰超閎包荒景靈渥耀山林岳秀天
光乃照窮化機神探曠衆妙駭塵氛埃澄響清肖恢淵
博量騰嶮峻邵振綱宇表登軌絕蹈厥初藏器棲蟠海
岳披藻崑崙濯秀暘谷沉輝熙茂清塵熠鑠含章在淵

發揮龍躍時服陽九承乾之衰有皇于井玉軒徘徊爰
茲赫亦升需期雲飛天步皇輿載見太微華堂誕基委蛇
自階圓輝既濟嘉命乃集和美未飪宰物下邑康年屢
登惠風時協在斷無頗于教斯輯金虎覲精戎車孔肆
神器操德越天人釋位有命在茲帝思元帥委弁總于振
翼虎噬相桓威靈既授六軍有序乃誓我衆乃整我旅
神于山立雄旗電舉懸旌汜陽即戎江滸我后日敬上
帝臨余靖端共夙夜匪寧匪處乃幹中軍入作內輔公
侯陔降在帝左右關羽滔天作雲西土帝曰將軍整爾
罷虎赫赫明明皇輿出祖龍舟照淵旒旒映野鋪敦江
濱仍執醜虜荆南既集方險未夷天子命我撫之西垂
公侯戾止威神緝熙虔劉作虐思輯子來妖於北靡

爾雄旗獵彼羣蠻祁祁遺黎柔遠能和濟言綏之方隅
肅清烈文雋武舍爵明堂用勳天府天子曰咨我圖乃
功錫爾青土建侯于東開國名墟光宅海邦分圭作寶
軒輅以庸既受帝祐公用加大駟鐵孔阜元戎杳藹淑
旂飛藻綏章承蓋振我輝靈四方于邁劉王負險寇我
西隣公侯赫怒干戈啓陳金鉞鏡日雲旗絳天凌而襄
岳沈維括淵元土隕難鯨鯢墜鱗我漢時燼方域清塵
曹休東踰我疆斯越帝簡厥佐將命其傑乃俾我公啓
行警伐江漢之許天子授鉞揖帝整旅隱爾霆發桓桓
神誅震驚魏方我公矯矯虎視元戎殲彼醜旅効此武
功武功既彰天威薄曜靈武震華邊陲清暴振旅凱入
王假有廟假廟伊何本庸籠祚土田陪敦

餞于郊此惟予顧禮嘉嵩高樂和湛露改容肅至傾蓋
寵步盤帶翩紛珍裘問那區宇惟寧繁遏帝社於穆疇
咨敷奏多士將庸元輔天子僉曰公侯宜有爰止繡裳
縟藻衮帶重紩遂虛上司命公登宰帝曰丞相朕嘉君
德以茲軒冕任踐乃職宣爾睿心惟皇協極邦國若否
四方爾式公拜稽首欽翼嗣聖乃御幾衡仰徽七政祗
恪本顯無易惟命巍巍大邑惟清四門公侯作弼煥炳
皇文重輝熾景協風煙煜百神秩祀兆獻思淳克諧庶
尹遂成帝勳時雍既濟王途克廣儀形我度軌物垂象
後遐施歸崇蔭惠仰茂德棲音廣問沈響洪範遠迪玄
猷洞深靈澤崇敷天險垂陰翰飛樂嶮淵蟠沫沉澤思
豐丘泉潤博雲林遭世大過彝倫靡肅豐豐公侯思維
雅俗發憤戎衣永言禮樂被分敦化荷 戈思學體仁長
物御風熙國獻鑿擢微玄輝鏡璞戒危膏梁收後白屋
五品時訓民神攸鑠我有煥文如曜如辰何以崇之匪
聞伊人我有烈武如震如霆何以將之保大豐年思弘
景業熙世登民克壯碩老秉鉞河津社作勿引早世幽
神仰慕遺輝瘖辟憂殷嗚呼哀哉永惟我公克明德心
幼藹芳和被之惠林公侯歟矣孰嗣徽 音名存體逝德
茂形潛民之秉思好是謳吟嗚呼哀哉惟帝念功寵命
光大考謚典謨崇榮協泰安官書考我公于邁輔軒啓
塗先驅驚旆哀風結輿遺恩蓋舍此休明即彼重藹
攀慕靡及永戀光愛嗚呼哀哉

故散騎常侍陸士龍誄

陸士龍

惟太康五年夏四月丙申晉故散騎常侍吳郡陸君卒
嗚呼哀哉天降純嘏誕育俊乂才九奧德鍾三懿應運
繼期顯微闡昧特恢宏猷雍化熙世昊天不吊奄忽零
墜嗚呼哀哉朝隕宗祚邦喪國輝帝欽遺烈士詠清機
思經皇心痛浹民懷搢淚乞邑惜慟盈畿敢述洪迹于
茲素旂其辭曰

於穆皇源時惟誕弘權與有媯爰帝暨王徽音接響是
祚克昌乾鑿南嶽誕降我祖顯考尚書納言帝宇正命
惟允銓衡收序篤生常侍固天所隆祚以靈粹陶以惠
風道協體稟德與性鍾叡心遠暢淵思遐通瞻言潛覽
克哲克聰耽精遐奧肆志篇章仰咨遺訓思齊曩蹤擒
光丞晦微言是網錯綜羣藝精徹豪芒顯允閑姿既明
且縉敦叙汎愛經德紀義契開邦族是綜是締博約以
禮陳錫載施雍雍閨闈克諧由仁率禮崇化色養寧親
九族和睦德被宗妯猗猗髦俊祁祁縉紳鑽仰剛範挹
道希塵愷悌弘裕惠化是振潛機密暢靡幽不甄濯以
清波權以明鈴旌善板築刊穢紫辰邦無媿幸靈不年
真沐浴玄源風移俗純儀德鄒甸北化泗濱耀略切輝
既升末融爰莅揚邑作尹名邦密邇帝畿大東小東宣
敷五教淑化以崇徵無墜命與無廢功帝欽良政民懷
穆風粵稽舊章率由典刑考績三載絀幽陟明超踐皇
闈紆組垂纓奕世納言帝衡以平本崇曩烈堂構克榮
征聲屢振干戈未戢乃秉雄戟徵戎東邑四牡徂征威
德以立爰午會稽青紱所襲帝曰欽哉疇咨羣后改授

顯服屯騎是撫雍容皇甸綜文經武時值大過士爽其
 德虔惟常侍高剛柔直履冰察霜淪心遠測春存三季
 形志于色頰頰厄運載離咎慙請亨思順曹氏匪革投
 并釋紱皓恩東嶽遁世無悶清源是濯馥風彌馨嗣微
 載縲皇途既闢天罔誕張運在九五違嶮即康猗歎高
 懿避風遠臧帝降大命丘園是揚裸將天邑舒藻舊京
 僉曰休哉昭德塞違乃升常伯補闕拾遺振纓紫極據
 光大微奕奕玄冕熠熠貂璫仰耀皇維俯映明堂輿振
 鳴鸞體佩琮璜居德彌冲雖休匪康既跼君宿未跼
 辰將陟太階弘載育民皇靈靡顧大命奄臻厲凶彌留
 儵忽頽湮嗚呼哀哉黃河難澄梁木易荒聖賢絕景希
 世齊光豈曰徒生實維天綱於鑠常侍本德昭仁
 瑤響仰綴玉振其在克壯自蹇乘屯鳳翳靈條龍宮祕
 泉收逋匿耀洪略陶緼雖跼嘉運託景風雲瑰光既耀
 靈寶未闢弗慮皇圖銜恨徂遷嗚呼哀哉江河慕海丘
 陵樂山於惟君德齊聖廣淵羣彥景附漸化濯真蓋以
 崇嚴函以裕淵西徂華源負澤慕塵幽萌潛暢滯思賴
 振六言六行匪君不肅五有三無匪君不極衡准失平
 匪君不直方榮遐邇庶君不式君其永沒民其焉則結
 思遺愛惟哀允恤嗚呼哀哉仲尼喪魯孺慕失聲國僑
 殞鄭邦無筭笙簧惟常侍徽懿克嗣恩懷士心信結民
 情聞者巷泣赴者征八音輟響獻酢弗營羽檄翳川
 輕駕盈庭揮袂雲華淚雨零嗚呼哀哉伊惟平生襲
 寵荷輝愷樂承嗣桑榆猶哀聿懷震丘言告言歸嗣德

遠燭慮凶以音雖則泰存亡是卹爰築親邑經始匪
日眷懷不虞寧觀斯王事靡盬皇畿是旋鳴和吉往
曾未浹辰震怖凶歸景長泯痛感皇祇哀晉四民嗚
呼哀哉穆穆天丁昭明有融乃命三人禮憲是崇賜以
歸賻榮以贈終元蓋南祖映族輝邦日薄南陸辰次天
漢龜筮協貞靈域載判明器既庇神道已羨縣象未登
闕星有爛軒車微動執紼同贊未棄高廈黃廬是館寧
被昏昧荒此輝粲幽房長鍵脩夜靡旦翼翼輕蓋翩翩
丹旂龍章舒藻旗旒有輝轡輪轆結玄駟徘徊人誰弗
思靡思匪哀援扎心楚投翰餘悲嗚呼哀哉

廣文選卷第七十三

江都葛潤校

廣文選卷第七十四

明通議大夫都察院右副都御史公庾劉節廣

哀

文嗣王皇后哀策文

晉武帝

明明先后興我晉道暉章淑問以翼皇考邁德宣猷大
業有造貽慶孤稼堂構疋保庶資復顧末享難老奄然
登遐弃我何早沈哀罔訴如何穹昊嗚呼哀哉厥初生
民樹之惠康帝遷嗣德顧予先皇天立厥配我皇是光
作邦作對德音無疆嗚呼不吊天篤降殃日沒嗣夷中
年隕喪榮榮在夜未懷摧傷尋惟景行於穆不已海岱
降靈世荷繁祉未幾祚胤篤生文母誕膺純和淑慎容
止質直不渝愷茲孝友詩書是悅禮籍是紀三從無違

中饋允理追惟先后勞謙是尚爰初在室竭力致養孀
于大邦皇基是相謚靜隆化帝業以創內叙嬪御外協
時望履信居順德行洽暢密勿無荒劬勞克訓崇儉抑
華冲素是放雖享宗高歡加未饗胡寧弃之我將曷仰
咨余不造大罰存臻皇考肯世始喻二年仰奉慈親冀
無後艱凶災仍集何辜于天嗚呼哀哉靈輻夙駕設祖
中闈輶輓動軫旣往不追哀哀皇妣永潛靈暉進攀梓
宮顧援素旂屏營窮痛誰告誰依訴情贈策以舒傷悲
尚或有聞顧予孤遺嗚呼哀哉

武元楊皇后哀策文

晉武帝

天地配序成化兩儀王假有家道在伉儷姜嫄佐譽一
妃為媯仰希古昔冀亦同規今胡不然景命夙虧嗚呼
哀哉我應圖錄臨統萬方正位于內寔在嬪嬙天作之
合駿發之祥河嶽降靈啟祚華陽奕世豐衍朱紉斯煌
纘女惟行受命溥將來翼家邦憲度是常緝熙陰教德
聲顯揚昔我先妣暉耀休光后承前訓奉述遺芳宜嗣
徽音繼序無荒如何不吊背世隕喪望齊無主長去蒸
嘗追懷永悼率土摧傷嗚呼哀哉陵兆既窆將遷幽都
宵陳夙駕元妃其徂宮闈遙寄階庭空虛設祖布紉告
駕啓塗服蠶綸狄奇蒙容車金路騰藹宸帳不舒千乘
動軫六驥躊躇銘旌樹表雲柳雲敷祁祁同軌岌岌蒸
徒執不云懷哀感萬天寧神虞卜安禮之廬土房陶篋
齋制遂初依行紀謚聲被八區雖昔聖光亦歸皇姑沒
而不朽世德作謨嗚呼哀哉

晉武帝哀策文

張茂先

感大饗之無虧哀鐸俎之虛設四龍輜以長叫痛靈暉之潛逝其辭曰

欽惟皇考體道之直德侔乾坤齊曜三辰應期登禪協于天人上凌郊祀下惠兆民憲章唐虞允得其津搜揚灰陋故老是賓百揆時序盛業日新恩從雲翔威猶霆震江海靜波岷岳無塵四夷率服莫不來臣肅慎奉貢越裳効珍化此弊俗歸之至淳皆在上聖咸享百年哀哀皇考用不是臻遘厲彌侵景命殞顛舍此昭晰即彼幽玄仰瞻靡怙廓若無天終制尚儉率由典度華幕弗陳器必陶素不封不樹所在惟固貽法來世是則是慕大隧既啓吉日將征鍾鼓雷震白虎抗旌龍螭讓首良駟悲鳴倡者振鐸挽夫齊昔昔此崇殿將適下庭玄官窈窕脩夜冥冥光燈未戢幽闔長局仰設皇窮零淚屏營云誰能忍寄之我情結心墳隴永憑聖靈

晉元帝哀策文

郭景純

未惟殿宇之廓寂悲彝奠之莫歆或鸞輅之晏駕哀哀裘之委衿痛聖躬之遐仕長淪景於太陰乃作策曰王之不極百六作鯨鵬集瓊林鯨躍神淵懷愍失據海覆岳巔蠢蠢六合曰不測無靈慶有底見龍在田誰不極哉我后先天大人垂道垂嗣繼作撫征淮海駿命再廓仁風旁靡神化濬深處冲志絕居簡行約聖敬日邁玄心逾漠用物與能忽攬游路林無滯才山無遺錯恩靡不懷化靡不被法茫茫海域款塞慕義萬里同塵罔匪

王隸熙熙遺黎莫知其守括終年
年曰德慶隆奈何氣厲奪集聖
天憐其景崑頤其壽小子貌孤冲靡天何載靡
地何憑恍惚極莫若存若終喪焉無聞廓焉長寂聆音
靡瞻瞻顏失視窮號曷訴心誰生何悲之哀何痛之
酷嗚呼我皇逢天之戚嗚呼哀哉耿然升遐即安玄室
煌煌火龍赫赫朱鞞終焉未潛其有出嗣訓長絕小
子何述望阜增欷臨崩慟慟哀兼陟有痛過過密靈爽
安之反貞復質未合元漢終始得一

哀辭

金瓯哀辭

曹子建

金瓯余之首女雖未能言固已授色知心矣生十九旬

天折乃作辭曰

在襁褓而撫育向孩笑而未言不終年而夭絕何負罰
於皇天信吾罪之所招悲弱子之無譽去父母之懷抱
滅微骸於糞土天長地久人生幾時先後無覺促爾有
期

仲雍哀辭

曹子建

曹楷字仲雍魏太子之中子也三月而生五月而亡昔
后稷之在寒冰鬪穀之在楚澤咸依鳥憑虎而無風塵
之災今之玄弟文茵無寒冰之慘羅幃綺帳暖於翔鳥
之翼幽房閑宇密於雲夢之野慈母良保仁乎烏虎之
情卒不能延期於暮載雖六旬而夭歿彼孤蘭之耿耿
亮成幹其畢榮哀綿綿於弱子早背世而潛形且四孟

之未周將願之乎一齡陰雲回於素蓋悲風動其扶輪
臨埏闋以歔歔淚流射而霑巾

陽城劉氏妹哀辭

潘安仁

鳥鳴于柘烏號于荆徘徊躑躅立聞其聲相彼羽族矧
伊人情叩心長叫痛我同生誕育聖王發奇稚齒如彼
名駒昂昂于里劉氏懷寶未躍隨和伊予輕弱弗克負
荷祿微于朝貯匱于家俾我令妹勤儉備加珍羞罕御
器服靡華撫膺恨毒逝矣奈何哀哀母氏蒸蒸聖慈震
慟擗撫何痛如之魂而有靈豈不慕思嗟哉往矣當復
何時

悲邢生辭

潘安仁

周文公之苗裔予元舅之洪胄厲操確其不拔鄉譽著
而日就妙邦畿而高察雄州閭以擢秀茂實暢矣而休
名未衍其財至貧其位至賤而死之日奔者盈庭停余
車而在郊撫靈襯以增悲瞻轎容而想像曾無覲乎餘
輝送子兮境垂末訣兮路岐一別兮長絕盡哀兮告離

碑文一

漢魯相置孔子廟卒史碑文

司徒臣雄司空臣戒稽首言魯前相瑛書言詔書崇聖
道勉闕孔子作春秋制孝經闕二五經演易繫辭經
緯天地幽讚神明故特立廟褒成侯四時來祠事已即
去廟有禮器無常入掌領請置白石卒史一人典主守
廟春秋饗禮財出王家錢給大酒直須報謹問太常祠
曹掾馮牟史郭玄辭對故事辟雍禮未行祠先聖師侍

者孔子子孫太宰太祝各一人皆備爵太常丞監祠
河南尹給牛羊豕雞闕二各一大司農給米祠臣愚以

為如瑛言孔子大聖則象乾坤為漢制作先世所尊祠

用衆牲長吏備闕二欲加寵子孫敬恭明祀傳于罔極

可許臣請魯相為孔子廟置百石卒史一人掌領禮器

出王家錢給太酒直他如故事臣雄臣戒愚戇誠惶誠

恐頓首頓首死罪死罪臣稽首以聞制曰可元嘉三年

三月二十七日壬寅司徒雒司空美下魯相承書從事

下當用者選年四十以上經通一藝雜試通利能奉弘

先聖之禮為宗所歸者如詔書到言永興元年六月甲

辰朔十六日辛酉魯相平行長史事下守長擅叩頭死

罪敢言之磨滅不司徒司空府壬寅詔書為孔子廟置

百戶卒史一人掌主禮器選年四十以上經通一藝雜

試能奉弘先聖之禮為宗所歸者平叩頭叩頭死罪死

罪謹按文書守文學掾魯孔龢師孔憲戶曹史孔等雜

試龢脩春秋嚴氏經通高第事親至孝能奉先聖之禮

為宗所歸一除龢補名狀如牒平惶恐叩頭死罪上司

空府讚曰魏魏大聖赫赫彌章相一瑛字少鄉平原高

唐人令鮑豐字文公上黨屯留人政教稽古名重規矩

一君察舉守宅除吏孔子十九世孫麟廉請置百戶卒

吏一人鮑君造作百戶吏舍功垂無窮於是始缺

漢魯相晨孔子廟碑文

建寧二年三月癸卯朔七日巳酉魯相臣晨長史臣謙

頓首死罪上尚書臣晨頓首頓首死罪死罪臣蒙厚恩

受任符守得在奎婁周孔舊寓不能闡弘德政恢崇一
變夙夜憂怖累息屏營臣晨頓首頓首死罪死罪臣以
建寧元年到官行秋饗飲酒畔官畢復禮孔子宅拜謁
神坐仰瞻楹楅俯視几筵靈所馮依肅肅猶存而無公
出酒脯之祠臣即自以奉錢脩上案食醊具以叙小節
不敢空謁臣伏念孔子乾坤所挺西符獲麟為漢制作
故孝經援神契曰玄丘制命帝卯行又尚書考靈耀曰
丘生倉際觸期稽度為赤制故作春秋以明文命綴紀
撰書脩定禮義臣以為素王稽古德亞皇代雖有褒成
世享之封四時來祭畢即歸國臣伏見臨璧雍日祠孔
子以太牢長史備爵所以尊先師重教化也夫封土為
社立稷而祀皆為百姓興利除害以祈豐穰月令祀百
辟卿士有益於民矧乃孔子玄德煥炳光于上下而本
國舊居復禮之日闕而不祀誠朝廷聖恩所宜特加臣
寢息耿耿情所思惟臣輒依社稷出王家穀春秋行禮
以供禮祀餘闕賜先生執事臣晨頓首頓首死罪死罪
臣盡力思惟庶政報稱為效增異輒上臣晨誠惶誠恐
頓首頓首死罪死罪上尚書

昔在仲尼叶光之精大帝所挺顏母毓靈承敝遭衰黑
不代倉闕不應聘嘆鳳不臻自衛反魯養徒三千獲麟
趣作端門見徵血書著紀黃王饗應主為漢制道審可
行乃作春秋復演孝經刪定六藝象與天談鈞河擿洛
却揆未然巍巍蕩蕩與乾比崇

魯相顏氏乞復顏氏開官氏繇發碑文

惟末壽二年青龍在涪灘霜月之靈皇極之日魯相河
南京顏君追惟太古華胥生皇維顏誕育至寶宰制元
道百王不改孔子近聖為漢定道自天王以下至於初
學莫不顛思嘆仰師鏡顏氏聖舅家居魯里并官聖妃
在安樂里聖族之親禮所宜異復顏氏并官氏邑中繇
發以尊禮心念聖歷世禮樂陵遲秦項作亂不尊圖書
倍道畔德離敗聖輿食糧亡于沙丘君於是造立禮器
樂之音符鐘磬瑟鼓雷洗觴觶爵鹿俎豆籩枌禁壺脩
飾宅廟更作二輿朝車威熹宣杼玄汗以注水流法舊
不煩備而不奢上合紫臺稽之中和下合聖制事得禮
儀於是四方士仁聞君風耀敬詠其德尊其大人之意
卓彌之思乃共立表石紀傳億載其文曰

一統華胥承天畫卦以尊空桑孔制元孝俎祖紫宮大
一所授前闔九頭以什言教後制百王獲麟未吐制不
空存承天之語乾元以來三九之載八皇三代至孔乃
作聖人不世期五百載三陽吐圖二陰出讖制作之義
以俟知奧於穆韓君獨見天意復聖之族遠越紀思脩
造禮樂瑚璉器用存古舊宇愬懃宅廟朝車威熹出誠
造漆不水解工不爭賈深除玄汗水通注禮器升
堂天雨降澍百姓祈和舉國蒙慶神靈祐誠竭敬之報
天與厥福永享年壽上極華紫旁及皇代刊石表銘與
乾輝耀長期蕩蕩於盛復授赫赫罔窮聲垂億載

漢西嶽華山廟碑文

周禮職方氏河南山鎮曰華謂之西嶽春秋傳曰山嶽

則配天乾坤定位山澤通氣雲行雨施既成萬物易之
義也祀典曰日月星辰所昭仰也地理山川所生殖也
功加於民祀以報也禮記曰天子祭天地及山川歲徧
焉自三五迭興其奉山川或在天子或在諸侯是以唐
虞疇咨四嶽五歲一巡狩皆以四時之中月各省其方
親至其山柴祭燔燎夏商則未聞所損益周禮於二代
十有二歲王巡狩殷國亦有事於方嶽祀以圭璧樂奏
六歌高祖初與改秦淫祀太宗承循各詔有司其山川
在諸侯者以時祠之孝武皇帝脩封禪之禮恩登假之
道巡省五嶽禋祀豐備故立宮其下宮曰集靈宮墜曰
存僂墜門曰望僂門仲宗之世重使使者持節祀焉歲
一禱而三祠後不承前至于七所禱用丘虛迄今垣址
營兆猶存建武之元事舉其中禮從其省但使二千石
以歲時往祠其有風旱禱請祈求靡不報應自是以來
百有餘年有事西巡輒過享祭然其所立碑石刻紀時
事文字摩滅莫能存識延熹四年七月甲子弘農太守
安國亭侯汝南袁逢掌華嶽之主位應古制脩廢起頓
閔其若茲深達和民事神之義精通誠至禘祭之福乃
案經傳所載原本所由銘勒斯石垂之于後其辭曰
巖巖西嶽峻極穹蒼右河朔遂荒華陽觸石興雲雨
我農桑資糧品物亦相瑤光崇冠二州古曰雖梁馮于
豳岐文武克昌天子展義巡狩省方玉帛之贄禮與岱
亢六樂之變舞以致康在漢中葉建設宇堂山嶽之守
是秩望侯惟安國兼命斯章尊脩靈基肅共壇場明德

惟馨神歆其芳遏禳凶札孽歛吉祥歲其有年民說無疆

廣文選卷第七十四

江都葛澗校

廣文選卷第七十五

明通議大夫都察院右副都御史大庾劉節廣

碑文二

桐柏廟碑文

王延壽

延熹六年正月八日乙酉南陽太守中山盧奴張君處正好禮尊神敬祀以淮出平氏始於大復潛行地中見於陽口立廟桐柏春秋宗奉災異告誥水旱請求位比諸侯聖漢所尊受珪上帝太常定甲郡守奉祀務潔沈祭從郭君以來二十餘年不復身到遣行承事簡略不敬明神弗歆災害以生五嶽四瀆與天合德仲尼慎祭常若神在君準則大聖親之桐柏奉見廟祠崎嶇逼狹開拓神門立闕四達增廣壇場節治蓋高大殿宇穿

齊傳館石獸表道靈龜十四衢廷弘敞宮廟高峻祇慎
慶祀一年再至躬進牲牷執玉以沈為民祈福靈祇報
祐天地清和異祥昭格禽獸碩茂草木芬芳黎庶預社
民用作頌其辭曰

泫泫淮源聖禹所導湯湯其逝惟海是造䟽穢濟遠柔
順其道弱而能強仁而能武聖賢立式明哲所取定為
四瀆與河合矩烈烈剛府好古之則虔恭禮祀不愆其
德惟前廢弛匪恭匪力災眚以興陰陽以忒陟彼高岡
臻茲廟側肅肅其敬靈靈降福雍雍其和民用悅服穰
穰其慶年穀豐植望君駕扶老携集慕君塵軌奔走
忘食懷君惠貺思君罔忘于胥樂兮傳於萬億

西岳華山亭碑文

衛伯儒

惟光和元年歲在戊子名曰咸池季冬己巳弘農太守
河南樊府君諱毅字仲德下車之初恭肅神祀西嶽至
尊詔書奉祠躬親自往省從勞謙即事有漸散齊華亭
齊堂逼窄郡縣官屬清齊無處尊卑錯綜精誠不固畏
天之威逢斯瘁怒時雨不興甘澍不布念存黔首懼闕
曠素於是與令已郡胸忍先謹公謀圖議繕故斷度持
廊立室異處左右趣之莫不競慕二年正月己卯興就
既成有元休嘉啓寤各得竭情福祿是顧刻茲碑號吏
卒俠路其辭曰

巖巖西嶽五鎮次宗緒德之尊太華優隆皇帝永思祀
典孔明高神肯宴圭璧贄通赫赫在上以畜萬邦惟嶽
降神寔生羣公卿士百辟纘業攸蒙帝命不違歲事報

功羣后命卿散齋外亭敬恭明祀以奉皇靈處所逼窄
脣窳有聲神樂其靜脩翬無形尊卑有序潔心致誠因
繕舊室整頓端平在其板屋孰不加精天人同道萬祚
來迎既受帝社延于後生為龍為光顯又王庭為公為
侯福祿來成刻石紀號永享利貞

光武濟陽宮碑

蔡伯喈

王室中微哀平短祚姦臣王莽偷有神器十有八年罪
盈惡熟天人致誅帝乃龍見白水淵躍昆涘破前隊之
眾殄二公之師收兵略地經營河朔於是羣公諸將據
河洛之文協符瑞之徵僉曰歷數在帝踐祚允宜乃以
建武元年六月即位于鄗縣之陽五成之陌祀漢配天
罔失舊物享國三十有三年方內又安臺榭率服巡狩

太山禪梁父皇代之遐述帝考之上儀固不異舉道德
餘慶延于無窮先民有言曰樂樂其所自生而禮不忘
其本是以虞和姒泚姬美周原皇天乃眷神宮實始
此厥路藐哉所謂神麗顯融越不可尚小臣河尹瑋來
在濟陽願見神宮追惟桑梓褒述之義用敢作頌其辭

曰
赫赫炎天爰曜其暉篤聖皇二漢之徵稽慶度則誕
育靈姿黃蘗作匿冥極天機帝赫斯怒爰整其師應期
潛見扶陽而飛禍亂克定群凶殄夷在復帝載萬國以
緩巡于四岳展義省方登封禪升于中皇爰茲初基
天命孔彰子子孫孫保之無疆

少南周巨勝碑文

蔡伯喈

君諱總字巨勝陳留太守之孫也君應白
乾之淳靈繼命世之期運玄懿清廟貞厲精粹體仁足
以長人嘉德足以合禮總六經之要括河洛之機援天
心以立均贊幽明以授時沉毅微密淪於無內寬裕弘
博含平無外之纖罔不總也是以實繁於華德盈乎譽
初以父任拜郎中疾去官察孝廉是時郡守梁氏外戚
貴寵非其好也遂以病辭太守復察孝廉乃俯而就之
以剛可否然猶私存衡門講誨之樂不屑已也又委之
而旋故大將軍梁冀專國作威海內從風世之雄材優
逸之徒莫不委質從命而顛覆者蓋以多矣聞君洪名
前後三辟而卒不降身由是縉紳歸高辟公事德大尉
司徒再辟三辟察賢良方正舉才襄賁令皆病不就擾
攘之際災眚仍發聖上詢諮師錫策公車持徵君仰瞻
天象俯效人事世路多險進非其時乃托疾杜門靜居
里巷無人跡外庭生蓬蒿如此者十餘年強禦不能奪
其守王爵不能滑其慮至延熹二年乃更闢門延賓享
宴醇樂及秋而梁氏誅滅十二月君卒然則識機知命
可覩於斯矣洋洋乎若德雖崇山千仞重淵百尺未足以
喻其高究其深也夫三精垂耀處者有表爰在上世作
者七人焉有該百行備九德齊光日月洞靈神明如君
之至者與宜所謂天民之秀也享年五十不登期考遐
邇歎悼痛心失圖乃相與建碑勒銘以徵休美其辭曰
厥初生民天賜之性有龐有醇存否有聖伊茲周君允
丁其政誕茲明德自始哲今奧乎其文如星之布確乎

不拔如山之固追綜先緒應期作度潛心大猷譚思德
謨遁世無悶屢辭王尊洋洋必丘于以道遙茂爾童蒙
是訓是教瞻彼榮華諸雲霄優哉游哉侔此弘高名
振華夏光耀昆苗清風丕揚德音孔昭

京兆尹樊陵碑文

蔡伯喈

於顯哲尹誕德孔彰膺帝休命謂篤不忘爰納忠式規
悟聖皇欽崇園邑大孝允光九命車服昭示采章軒輶
四牡承祀蒸嘗多士時貢繇役永息進路孔夷民清險
棘同體諸舊兆萌蒙福惠垂無疆守以罔極

九疑山碑文

蔡伯喈

巖巖九疑峻極于天觸石膚合興播建雲時風嘉雨浸
潤下民芒芒南土實賴厥勛逮于虞舜聖德光明克諧
頌傲以孝蒸蒸師錫帝世堯而授徵受終文璇璣是
承太階以平人以有終遂葬九疑解體而升登此崔嵬
託靈神仙

漢酸棗令劉熊碑文

君諱熊字孟闕廣陵海西人也厥祖天皇大帝垂精接
感生聖明闕仍其則子孫亨之分源而流枝葉扶疏出
王別胤受爵列土封侯載德相繼不顯闕光武皇帝
之玄孫廣陵王之孫俞鄉侯之季子也誕生照明岐嶷
踰絕長闕柴守約履勤體聖心叡敦五經之瑋圖兼
古業覈其妙行脩言道闕宜京夏莫不師印六籍五
典如源如泉既練州郡卷舒委隨忠貞闕效官闕出
省揚土流化南城政猶北辰衆星所從三祀有成來臻

我邦循東闕之惠抑闕禮官宣進厲頑約之以禮博之

以文政教始初慎微五典勤恤民放闕心顧下闕仁

恩如冬日威猛炎夏貪究革情清修勸慕德惠潛流幽

芳旁布尤愍縣闕濟濟之儀孜孜之論帥厲後學致之

雍泮草上之風莫不響應悅誨日新砥闕素七業勃

然而興成居今而好古雖未盡道善必有所由處民之

秉彝寔我劉父其人魯無君子斯焉取施允我劉父言

善誘人講禮習聆匪徒豐學屢獲有年闕載文成神其

協欣兩不相傷故德交歸焉自古在昔先民有作洪範

則甄盛德闕刻表諸來世垂之罔極褒賢表善揚闕技

微式序在位量能授宜官無曠事闕為正以卒焉闕

愍念蒸民勞苦不均為作正彈闕設門更富者闕

樂貧者闕順四時積和感暢歲為豐穰賦稅不煩寔我

劉父吏民愛若慈父畏若神明悔闕今德清越孤竹德

牟產奇誠宜褒顯照其憲則乃相闕咨度諏詢采摭謠

言刊闕詩三章其辭曰

清和穆鑠寔惟乾闕惟獄降靈篤生我君服骨叡聖

允鍾厥醇誕生以闕言協闕墳懿德震耀孝行通神動

履規繩文彰闕成是正服以道德民

有父子然後有君臣理財正辭束帛闕列像鶴

鳴一震天臨保漢寔生闕勲明試賦授夷夏已親嘉錫

來撫潛化如神其神伊何靈不傷人闕衍敷明

哲秉道之樞養闕之神惟德之偶淵乎其長渙乎成功

暇民豫新我闕通用行則達以誘我邦賴茲劉父用

說其闕 澤零年豐黔首歌頌

漢堂邑令費鳳誄碑文

惟熹平六年歲格于大荒無射之月堂邑令費君履疾卒嗚呼哀哉於是夫人元弟故闕三守卜胤追而誄之其辭曰

君體履柔和溫其如玉脩孝友乎閨闕執忠寒於王室

立迹州郡仕更右職舉直措枉強禦闕實孝三署勛

譽有則出宰近甸民懷厥德色斯輕翔闕然高潔王人

述職分闕班爵闕二招助鼎調物退已進弟不營榮

稷稷遲歷稔項領滯畜鄣土不庭黔民作闕一命君闕

政化闕行逆善遷惡三替致道有耻且格文守闕功

在堂邑垂拱不言而民帥伏三時之聞卒以闕

天不吊命也早歿春秋六十六黎儀瘁陽泣涕連灑豈

愛我躬命不可贖臨終迷闕三內發祖業良田畝直一

金推予弟息辭闕二讓財行義高邵卓不可及名實相副

有始有卒闕二人善愆方切惻

故吏故鄣施業字世堅義民堂邑戚忠忠年十有一慈

考早隕喪以備於禮制蓬首而闕三壤而消辟地闕三

行毋氏以闕四而悼傷服闕非五五線杖莫未除廣陵

之郡守東海闕二聞寢疾而終卒凡百普悲闕四舜化

比屋之餘慶隨闕棺柩車哀以而逆之祖載已畢託還

返其故鄉君闕其節操悲其有闕二每以闕五其老親

忠闕二君厚德念君之仁恩聞君之隕隧剝斷而辛酸

復截縗麻杖闕君之柩棺扶號而竭闕泣涕其闕八甫

於岐山闕其從之迷君而到官上書而薦君盡禽息之

之潤解忠業與闕二猶君恩使然雖君有大化孰能爾

者難子喪之終闕三思其顏而闕死可贖不愛闕二人

今君闕於彼卓譎而超倫吏民慕高蹤來者其如雨偉

名建闕一石垂示於闕二

門下功曹徐儗字元節主簿呂嘉字元闕主史陳信字

聖舉主記史闕忠字建臺門下闕二字叔騰門下

賊曹闕二字聖臺門下史曹助字仲臺闕吏呂崇字孝

讓從掾位徐超字元貴

廣文選卷第七十五

廣文選卷第七十六

明通議大夫都察院右副都御史大庾劉節廣

碑文三

張平子碑文

崔子玉

河南相張君南陽西鄂人諱衡字平子其先出自張老
為晉大夫納規趙武而反其侈書傳美之君天姿叡哲
敏而好學如川之逝不舍晝夜是以道德漫流文章雲
浮數術窮天地制作侔造化壞辭豐說奇技備藝磊落
煥炳與神合契然而體性溫良聲氣芬芳仁愛篤密與
世無傷可謂淑人君子者矣初舉孝廉為尚書侍郎遷
太史令實掌重黎歷紀之度亦能焯耀敦大天明地德
光照有漢遷公車司馬令侍中遂相河間政以禮成民

是用息遭命不末闇忽畧徂朝失良臣民隕令君天泯
斯道世喪斯文凡百君子靡不傷焉乃銘斯表以旌厥
聞其辭曰

於維張君資質懿豐德茂材羨高明顯融焉所不學亦
何不師盈科而逝成章乃達一物不知實以為耻聞一
善言不勝其喜包羅品類稟授無形酌焉不竭冲而復
盈廩廩其庶豐豐其幾膺數命世紹聖作師苟華必實
令德惟恭柔嘉伊則孝友祗容允出在茲維帝念功往
才女諧化洽民雖愍而不弔降此咎兇哲人其萎罔不
時恫紀於銘勒末終譽兮死而不朽芳烈著兮

楚相孫叔敖碑文

楚相孫君諱旣字叔敖本是縣人也六國時期思屬楚
楚都南郢南郢即南郡江陵縣也君受純靈之精懷絕
世之才有大賢次聖之質少見枝首虵對其母泣吾將
死毋問其故曰吾聞見枝首虵者死今日見之母曰若
奈之何吾殺行數十里念獨吾死可空復令他人見之
死為因埋掩其刑母曰若無憂焉其陰德玄善遂為父
母九族所異及其為相布政以道考天象之度敬授民
時聚藏於山殖物於藪宣導川谷波障源泉溉灌沃澤
堤防湖浦以為池沼鍾天地之美收九罟之利以愍潤
國家家富人喜優瞻樂業式序在朝野無螟螣豐年蕃
庶人有曾閔貞孝之行四民美好從容中節高相改幣
一朝而化其憂國心私垂三季不別牝牡繼高陽重
黎五舉子文之統其忠信外舅禮樂文章軌儀同制其

富國充民明天時盡地力寔堅禹稷不能踰也專國權
寵而不榮華一旦可得百金至於歿齒而無分銖之蓄
破玉玦不以寶財遺子孫終始若矢去不善如絕絃磬
患害於無刑徹節高義敦良奇介自曹臧孤竹吳札子
罕之倫不能驟也生於季末仕於靈王立溷濁而澄清
處幽暗而照明其遺武餘典恨不與戲皇帝代同世世
為列姪國在朝廷其意常墨墨若冠章甫而坐塗炭也
病甚臨卒將無棺槨令其子曰優孟曾許千金貸吾孟
故楚之樂長與相君相善雖言千金實不貸也卒後數
幸莊王置酒以為樂優孟乃言孫君相楚之功既忼慨
高歌曲曰貪吏而可為而不可為廉吏而可為而不可
為貪吏而不可為者當時有污名而可為者子孫以家
成廉吏而可為者當時有清名而不可為者子孫困窮
披褐而賣薪貪吏常苦富廉吏常苦貧獨不見楚相孫
叔敖廉潔不受錢涕泣數行若投首王王心感動覺悔
問孟孟具列對即來其子而加封焉子辭父有命如楚
不忘亡臣社稷圖而欲有賞必於潘國下濕堦堦人所
不貪遂封潘鄉即固始也三九無嗣國絕祀廢固始今
段君夢見孫君則存其後就其故祠為架廟屋立石銘
碑春秋蒸嘗明神報祚即歲還長棧太守及期思縣宰
段君諱光字世賢魏郡鄴人庶慕先賢體德允恭篤古
遵舊奉履憲章欽翼天道五典興通攷籍祭祠祗肅神
明臨縣一載志在惠康葬枯粟之愛育藜蒸討掃醜類
鰥寡是矜杜偽養善是忠表仁感想孫君迺發嘉訓興

祀立壇勤勤愛敬念意自然刻石銘碑千載表績萬古
標記福祐期思縣興士熾孫氏蒙恩漢延熹二年五月
二十八日立

漢北海相景君碑文

惟漢安二年仲秋關二故北海相任城景府君卒嗚呼
哀哉國關二寶英彥關一疇列宿虧精晚學後晚子何
穹蒼布命授期有生有死天是爲之豈夫仁哲彼克不
遺於是故吏諸生相與論曰上世羣后莫不流光關於
無窮垂芬耀於書篇身歿而行明體亡而名存或著形
像於列圖或繫頌於管絃後來詠其烈竹帛叙其勲乃
作誄曰

伏惟明府受質自天孝弟淵懿帥禮蹈仁根道核藝抱

淑守真能白清方克已治身寔柔寔剛乃武乃文過
孝謁假階司農流德元城興利惠民強禦改節微弱蒙
恩威立澤宣化行如神帝嘉厥功授以符命守郡益州
路遐戀親躬作遜讓夙宵朝廷建英忠謹拜秩東 璽
追嘉錫據北海相部城十九鄰邦歸向公明好惡先以
敬讓殘偽易心輕黠踰竟鸚梟不鳴分子還養元元鰥
寡蒙祐以寧蓄道脩德關社以榮紛紛今儀明府體之
仁義道術明府膺之黃朱邵父明府三之台輔之任明
府宜之以病被徵委位致仕民關思慕遠近搔首農夫
釋耒商人空市隨舉欽淚奈何朝廷奪我慈父去官未
旬病乃困危珪璧之關臨卒不回歎關霄絕奄忽不關
孝子彪惶顛倒剝摧遂關克寤末潛長歸州里鄉黨隕

涕奔哀故吏昭恒歔歔闕一個四海冠蓋驚慟傷懷大命闕期寔惟天闕明士設位明府不就臣子欲養明府弗留嗚呼哀哉

亂曰考積幽容闕三字闕四翔議郎方再命虎將綏元

元方規英集謨主忠信方羽衛藩屏撫萬民方闕四恩

闕二字闕方宜參闕一幹補方不來糜壽棄臣子方仁敷海

外著甘棠方闕石勒銘闕不亡方

漢泰山都尉孔宙碑

君諱宙字季將孔子十九世之孫也天姿醇嘏齊聖達

道少習家訓治嚴氏春秋緝熙之業既就而閨闈之行

允恭德音孔昭遂舉孝廉除郎中都昌長祗傳五教尊

賢養老躬忠恕以及人兼禹湯之罪已故能興朴闕二

闕彭濟弘功於易簡三載考闕城令是時東

首猶夏不闕三祠兵遺畔未寧乃擢君典戎以文脩之

旬月之間莫不解甲服罪闕三樽田峻喜于荒圃商旅

交乎險路會鹿鳴於樂崩復長幼於酬酢闕三稔會遭

篤病告困致休得從所好年六十一延熹六年正月乙

未闕三疾貴速朽之反真慕寧儉之遺則窀夕不華闕

器不設凡百印高闕三迷於是故吏門人乃共陟名山

采嘉石勒銘示後俾有彝式其辭曰

於顯我君懿德惟光紹聖作儒身立名彰貢登王室闕

闕是更夙夜闕二在公明明乃綏二縣黎儀以康於天

時離撫茲代山方闕一字闕彼凶人覆俾闕二南畝孔饁山有

夷行豐年多黍稱彼兕觥帝賴其勲民斯是皇疾闕三

乃委其榮忠告慤懃屢省乃聽恭儉自終簞簋不陳生
播高譽沒垂令名未矢不刊億載揚聲

漢中侍樊君碑文

君諱安字子佑南陽湖陽人也厥祖曰仲山父翼佐周
出納玉命為之喉舌以致中興食菜于樊子孫氏焉
奕世載德守業不徙在漢中葉篤生哲媛作合南頓晉
產世祖征討逆畔復漢郊廟而樊氏以帝元舅顯受榮
土封寵五國壽張侯以功德加位特進其次並已高聲
處鄉校侍中尚書據州典郡不可勝載為天下學治
詩論語孝經兼典記傳古今異義甘貧樂約意不回貳
天資淑慎稟性有直秉操不移不以覬貴世政促峻
宰寡識慢賢役德被以勞事然後慷慨官于王室歷中

黃門冗從儀史拜小黃門小黃門右史遷府令中常
侍其事上也貞固密慎矜矜戰戰作主股肱助國視聽
外職不誣內言不泄為近臣楷模以兄弟並盛雙據二
郡宗親賴榮年五十有六以求壽四年二月甲辰卒朝
思其忠追拜騎都尉寵以印綬策書褒歎贈有加嗣
子遷寔以幼弱夙敘王爵而喪所天禮備復位以延熹
三年冬十有一月自生蒸祭乃尋惟烈考恭修之懿勒
之碑石俾不失墜其辭曰

肅肅我君帝躬是翼王事多難我君是立秉此小心以
亮皇職惟帝念功庸以輿服大命領霄魂神遷佚龜艾
追贈用光其德藹藹遺稱作呈作式勒名茲石垂示罔
極勲名不剝永昭千億

漢桂陽太守周府君碑

桂陽太守周府君者徐州下邳人也諱憬字君光體性
敦仁天姿篤厚行興閨門名闕州里舉孝廉拜尚書侍
郎遷汝南固始相遂拜桂陽廼宣魯衛之政敷二南之
澤政以德綏化猶風騰撫集烝細闕綏有方進則貞直
退則錯柱崇舉濟濟吉士充朝招訓闕蒙開誘六蔽君
子道長小人道消信感神祇靈瑞符闕嘉穀生於野奇
草像闕一莆異根之樹超然連理於此闕時邦域惟寧
郡又與南海接比商旅所臻自瀑亭至乎曲紅壹由此
水其水源也出於王禽之山山蓋隆闕三于天泉肇沸
踊發射其顛分流離散為十二川彌陵濟阻丘阜錯連
隅阨壅遏末由騁焉爾乃貫山鑽石經闕四湯爭怒浮

沈潛伏闕地龍結屈遭隆鬱滯干渠萬澮合聚滌澗下迤

安闕一六瀧作難湍瀨闕二泫沄潏潏雖詩稱百川沸

騰高岸為谷深谷為陵蓋莫若斯天軌所經惡得已改

其下注也若奔車失轡狂牛無縻闕忽荒忽臚睦不相

知及其上也則群輩相隨檀柁提闕唱號慷慨沈深不

前其成敗也非徒喪寶玩隕珍奇替珠貝流象犀也往

古來今變甚終矣於是府君乃思夏后之遺訓闕應龍

之畫傷行旅之悲窮哀闕一人困危感蜀守冰殄絕犁

堆嘉夫昧淵未用夷易廼命良吏闕一帥壯夫排積闕

字石投之寥闕二高填下鑿截回曲弼水之邪性順導

其經脉斷稜濫之電波弱陽侯之汹涌由是小蹊乃平

直大道允通利抱布賔絲交易南至升成周旋功萬於

前除昔

闕二

樹塞於茲雖非龍門之鴻績亦人君之德

宗故船人嘆於水渚行旅語於塗陸孔子曰禹不決江

疎河吾其魚矣於是熹平三年歲在攝提仲冬之月曲

紅長零陵重安區社字景賢遵奉典憲宣揚德訓帥禮

不越欽仰高山乃與邑子故吏龔臺郭蒼龔雒等命工

擊石建碑于瀧上勒銘公功傳之萬世垂示無窮其辭

曰

乾坤剖兮建兩儀剛柔分兮有險夷咨中嶽兮穆崔嵬

嘆林衡兮獨傾虧增陵陷兮甚隘隔鮫莫涉兮禹不規

仰王禽兮又崑崙俯瀧淵兮怛以悲岸參天兮無路蹊

石縱橫兮流洄洄波隆隆兮聲若雷或抱貨兮以從利

或追恩兮有赴義汜自楫兮有不避闕躬軀兮於玄淵

委性命兮於芒編惜寒慄兮不皇計忽隨流兮殆忘歸

懿賢后兮發聖英閉不通兮治斯谿鑿巨石兮以填

開切闕

字

一兮導曲機摧六瀧兮弱闕五兮散其波威怒

定兮混瀾瀾息聊啾兮闕五逝兮蛟龍藏陸老唱兮臚

人歌名冠世兮超踰倫闕兮耀流沙功斐斐兮鏡

海裔君乎君壽不訾

淳于長夏承碑

君諱長字仲充東萊府君之孫太尉掾之仲子右中郎

將弟也累葉牧守印統典據十有餘人皆得任其位名

豐其爵是故寵祿傳于歷世策勳著于王室君鍾其美

受性淵懿含和履仁治詩尚書兼覽羣藝靡不尋暢州

郡更請屈已匡君為主簿督郵五官掾功曹上計掾守

令冀州從事所在執憲彈繩糾枉忠潔清肅進退以禮
允道篤愛先人後已克讓有終察孝不行大傳胡公歆
其德美旌招俯就羔羊在公四府歸高除淳于長到官
正席流恩褒善糾姦示惡旬月化行風俗改易轡軒六
轡飛躍臨津不日則月皓天不吊殲此良人年五十有
六建寧三年六月癸巳淹疾卒官嗚呼痛哉臣隸辟踊
悲動左右百姓號咷若喪考妣孩孩孤憤泣切怛傷摧勒
銘金石惟以告哀其辭曰

於穆皇祖天挺應期佐時理物紹繼先軌積行勤約燕
于孫子君之群戚並時繁祉明明君德令問不已高山
景行慕前賢列庶同如蘭意願未止中遭冤友不終其
紀夙世實祚早喪懿寶抱器幽潛未歸蒿里痛矣如之
行路感動儻魂有靈垂後不朽

漢玄儒先生莫壽碑

先生諱壽字元考南陽隆人也曾祖父修春秋以大夫
侍講至五官中郎將祖父太常博士徵朱爵司馬親父
安貧守賤不可榮以祿先生童孩多奇岐嶷有志挽髮
傳業好學不厭不修庶隅不飾小行溫然而恭愷然而
義善與人交久而能敬榮且溺之耦耕甘山林之杳藹
遁世無悶恬佚淨漠遲德衡門下學上達有朋自遠冕
紳莘莘朝夕講習樂以忘憂郡縣禮請終不回顧高位
厚祿固不動心麤絺大布之衣糲糲蔬菜之食蓬戶茅
茨樞甍翫樂天知命權乎其不可拔也是以守道識
貞之坐高尚其事鄉邠州鄰闕親愛懷年七十有八

平三年正月甲子不祿國人乃相與論德處謚刻石作
銘其辭曰

皇矣先生懷德惟明優於春秋玄嘿有成知賤為貴與
世無爭渾德衡門禮義滋醇窮下不苟知我者天身歿
聲鬯千載作珍繇之日月與金石存

廣文選卷第七十六

江都葛澗校

廣文選卷第七十七

明通議大夫都察院右副都御史大庾劉節廣

碑文四

童子逢盛碑

童子諱盛字伯彌薄令之玄孫遠成君之曾孫安平君
之孫五官掾之長子也胎懷正氣生克自然俯育孩嬰
弱而能言至於垂髫習惠聰哲過庭受試退誦詩禮心
開意審聞一知十書畫規矩制中園椀日就月將學有
緝熙才亞后彙當為師楷自天生授罔不在初謂當叩
遂令儀令色整齊珪角立朝進仕究竟人爵克啓厥後
以彰明德胤嗣昭達何愒季世顯夫不惠伯彊涇行降
此大戾年十有二歲在協給五月乙巳嚙喻不反友隕

精晁苗而不秀命有脩短無可奈何慈父悼傷割哀回
鯉其十二月丁酉而安措諸未潛黃壚沒而不存於是
門生東武孫理下密王升姜感愷三成一列同義故共
刊石叙述才美以銘不朽其辭曰
嘉慈伯彌天授其姿在克岐嶷聰睿敏達當遂遙迤立
旆建基時非三代符命無恒人生在世壽無金石身潛
名彰顯於後葉

巴郡太守樊敏碑

君諱敏字升達肇祖必戲遺苗后稷爲堯種樹舍潛于
岐天頭亶甫乃萌昌發周室衰微霸伯匡弼晉爲韓魏
魯分爲楊充曜封邑厥土河東樹漢之際或居于楸或
集于梁君續其緒華南西置濱近聖禹飲汶茹汾邇用
好學治春秋嚴氏經晉究道度無文不睹於是國君備
禮招請濯冕題謁傑立忠蹇有夷史之直卓密之風鄉
黨見歸察孝除郎朮昌長史遷宕渠令布化三載遭離
母憂五五斷仁大將軍辟光和中京師擾攘碓孤綏
綏冠履同囊投袂長驅畢志枕立國復重察辭病不就
再奉朝聘十辟外臺常爲治中諸部從事舉直錯枉譚
思舊制彈饕餮糾貪務鉏民穢患苦政俗喜怒作律案罪
殺人不顧倡厥告子屬孫散若此者不入墓門州里僉
然號曰吏師季世不祥米巫殍續蠶青羌姦狡並起
陷附者衆君執一心賴無泔耻復辟司徒道隔不往牧
伯劉公二世欽重表授巴郡後漢中秋老乞身以
助義都尉養疾閭里又行褒義校尉君仕不爲人祿不

爲已栢栢大度體蹈其旨當窮台緄松僑協軌八十有
四歲在汴洽紀驗期臻奄習臧形凡百咸痛士女涕泠
臣子衰術刊石勒銘其辭曰

於戲與考經德炳明勞謙損益耽古儉清立朝正色能
無撓廩威恩御下持滿億盈所歷見慕遺歌景形書載
俊艾股肱幹楨有物有則模楷後生宜參鼎鉉稽建皇
靈王路阪險鬼方不庭恒戢節足輕寵賤榮故闕大選
而損陪臣晏嬰擗殿留侯距齊非辭福也乃辟禍兮

亂曰演元垂闕岳瀆闕兮金精火佐寔生賢兮闕欲
救民德彌大兮遭遇陽九百六會兮當闕遐季今遂逝
兮嗚呼哀哉魂神闕兮

金鄉長侯成碑

君諱成字伯盛山陽防東人也其先出自幽岐周文之
後封于鄭鄭共仲賜氏曰侯厥胤宣多以功佐國要盟
齊魯嘉會自邠因以爲家焉漢之興也侯公納英濟太
上皇於鴻溝之阮謚曰安國君曾孫嗣封明統侯光武
中興玄孫霸爲臨淮太守擁兵從光武平定天下轉拜
執法右刺姦五威司命大司徒公封於陵侯枝葉繁茂
或家河洧或邑山濟君則上闕太守之弟幼履慈孝之
德長執忠謇之操治春秋經傳綜書傳以典籍教授滋
滋履真安貧樂道忽於時榮敬上接下温故知新矧節
建志冠於群倫孝友內著仁義外宣郡請署主簿督郵
五官掾功曹守金鄉長即家假印綬君介心如石不易
其志刺史嘉其高名辟部東平泰山治中役事君獻精

謙虛委地衡門以禮膺桓名德可尊行顯身隱縣輿養
神聖人制命曰仁常存今胡不然喪此國偉君年八十
一建寧二年歲在己酉四月二日癸酉遭疾而薨嗚呼
哀哉於是遐邇士仁祁祁來庭集會如雲號哭發哀泣
涕汎蘭將去白日歸彼玄陰同盟必至縞素填街存存
顯名終有遺勲魂如有靈嘉斯寵榮於是儒林衆壻惟
想邢景乃樹立銘石以揚淑美其辭曰

於穆君德姿履正平乾皇所挺應符如生耽藝樂術怡
忽世榮虛位禮請介然不傾壽非南山不俟河清梁木
圯頽鴻儀催零昆嗣切剝哀慟感情乃銘乃勒億載永
寧

漢故金城守殷君碑

衛伯儒

君諱華字叔時上郡定陽人大匠君之子也其先出自
有殷因國定氏不改其號聖哲玄流至君而懿幼膺瓊
蘭之美長有冲邈之志敦詩說禮韜韜竹賁誕循前業
守以恪恭仕歷州郡忠諤有聞其大操也眈眈虎視龍
變不羈故能雄傑於并域聲班於上京察州孝廉貢除
郎中左馮翊丞協宣文物公事知州舉茂才宛丘令崇
行寬猛示之禮禁褻延庠校政以惠和三載陟隕邪臨
金城郡障羗虜避難遷移役兼民匱室如懸磬乃敷權
略獎厲威信嚴狃率服不敢窺踰兵戢而時動因省獵
以習義興利弭患順其所樂開通狹道造作傳館吏士
咸悅不勞而勸是以縉紳之徒譚講雅誦釋軍旅之犀
革陳俎豆於泮宮其艾檐軫旌顯才良咨量三壽賞罰

不僭邦場寧靜歲時豐登耆叟擊壤童觀謳謔功庸顯
列當升寵祚天不憖遺景命失靈以光和元年九月乙
酉卒官生有嘉休終則鼎銘於是故吏邊竺江英韓緒
等追送遐丘刊石勒勛其辭曰

於惟明后懷德握醇昆台之耀秀出不群文昭有毅武
烈能仁含舒憲墨以育生民垂紀東壤西國著勛身歿
名流載世常存古之遺老非此孰云于爾臣思續其身
芬

漢蕩陰令張君碑

君諱遷字公方陳留己吾人也君之先出自有周周宣
王中興有張仲以孝友為行披覽詩雅煥知其祖高帝
龍興有張良善用蕭何在帳幕之內決勝負千里之外

祈珪於留文景之間有張釋之建忠弼之謨帝遊士林

問禽狩所有苑令不對更問畜夫畜夫事對於是進畜

夫為令令退為畜夫釋之議為不可苑令有公卿之才

畜夫喋喋小吏非社稷之重上從言孝武時有張騫廣

通風俗開闢闕一畿寓南苞八蠻西羈六戎北震五狄東

勒九夷荒遠既殞各貢所有張是輔漢世載其德爰既

且於君蓋其纏繚續戎鴻緒牧守相係不殞高問孝弟

於家中嘗於朝治京氏易聰麗權略藝於從畋少為郡

吏隱練職位常在股肱數為從事聲無細聞徵拜闕一

中除穀城長蠶月之務不開四門鵬正之際休囚歸賀

八目苙民不煩於鄉隨就虛落存恤高年路無拾遺黎

種宿野黃巾初起燒平闕一市斯縣獨全子賤孔茂

二道區別尚書教君崇其寬詩云愷悌君降其恩東
星潤色君垂其仁邵伯分陝君懿于棠晉陽珮璣西門
帶弦君之體素能贊其勳流關一基遷蕩陰令吏民頡
頤隨送如雲周公東征西人怨思奚斯讚魯孝父頌段
前詰遺芳有功不書後無述焉於是刊石整表銘勳萬
載三代以來雖遠猶近詩云舊國其命惟新
於穆我君既教既純雪白之性孝友之仁紀行來本蘭
生有芬克岐有兆綏御有助利器不覲魚不出淵國之
良幹垂愛在民滂沛棠樹温温恭人乾道不繆唯淑是
親既多受社未享南山干祿無疆子子孫孫惟中平三
年歲在攝提二月震節紀日上旬陽氣厥拊感恩舊君
故吏韋萌等僉然同聲賃師孫興刊石立表以示後昆
共享天祚億載萬年

漢印中郎固碑

君諱固字伯堅著君元子也含中和之淑質履上仁闕
孝友著乎閨門至行立乎鄉黨初受業於歐陽遂窮
究千典籍膺游夏之文學襄冉季之政事弱冠仕都吏
諸曹掾史主簿督郵五官掾功曹入則腹心出則爪耳
忠以衛上清以自脩犯類蹇需造厭讒辭加以好成方
類推賢達善遠遁退讓當世以此服之邦后珎璋以為
儲舉先屈計掾奉我闕貢清眇冠乎群彥德能簡乎聖
心延熹元年二月十九日詔拜郎中非其好也以疾固
辭未滿期限從其本規乃遘凶愍年四十二其四月止
四日遭命隕身痛如之何先是君大男孟子有楊鳥之

才善性形於岐嶷闕二見於垂髫年七歲而夭大君夫

人所共哀也故建闕共墳配食斯壇以慰考妣之心琦

璫延以為至德不紀則鍾鼎奚銘闕青姬闕武第述其

兄綜闕四行於蔑陋獨曷敢忘乃刊石以旌遺芳其辭

曰

於惟即中寔天生德願親誨弟處恭竭力教我義方導

我禮則傳宣孔業作世模式從政事上忠以自勗貢計

王庭華夏歸服帝用嘉之顯拜殊特將從睚意色斯自

得乃遭氛災隕命顛沛家失所怙國闕忠直俯哭誰訴

仰號焉告嗟嗟孟子苗而弗毓奉我元兄脩孝罔極魂

而有靈亦歆斯勒

陳君碑文

邯鄲子叔

君諱紀字元方太丘君之元子也始祖有虞受禪陶唐

亦以命禹其後媯滿當周武王時祚土于陳君其世也

君生應乾坤之純質受嵩岳之粹精內包九德外兼百

行淵深淪於不測瞻智應於無方弘裕足以容衆矜嚴

足以正世然後研幾道奧涉覽文學几前古往行竹帛

所載靡不坐該其善也亶亶焉其誘人也足以令聞廣

譽塞于天淵儀形嘉誨範乎人倫存乎本傳故略舉其

著於人事者焉顯考以茂行崇冠先傳季第亦以英才

知名當世孝靈之初並遭黨錮俱處于家號曰三君故

得奉常供養以循子道親執饋食朝夕竭歡及太丘君

疾病終亡喪過乎哀崩傷嘔血如此者數焉服禮既除

戚容彌甚聞名心矍言及隕涕雖太舜之終慕曾參之

自盡無以踰也豫州刺史嘉懿至德命勅百城圖畫形
象于今遺稱越在民口既處隱約潛躬味道足不踰闕
乃覃思著書三十餘萬言言不務華事不虛設其所交
釋合贊規聖哲而後建旨明歸焉今所謂陳子者也初
平之元禁罔蠲除四府並辭弓旌交至雖崇其禮命莫
敢屈用大將軍何進表選明儒君為舉首公車特徵起
家拜五官中郎將到遷侍中旬有八日出相平原會孝
靈晏駕賊臣秉政肆其兇害剝亂宇內州郡幅裂戎輿
並戒君冒犯鋒矢勤恤民隱馴之以禮教示之以知耻
視事未朞士女向方會刺史敗於黃巾幽冀二州爭利
其土君料敵知難不忍其民為已致死乃辭而去之於
是老弱隨慕板轅持持不得轉遂晨夜間行寓於邳

邳之野表術恣睢僭號江淮圖覆社稷結婚呂布斯事
成重必不測救君諗布不從遂與以婚送女在塗君為
國深憂乃奮策出奇以奪其心卒使絕好追女而還離
逃姦謀使不得成國用人安君之力也唯帝念功命作
尚書令會車駕幸許拜大鴻臚實掌九儀四門穆穆遂
登補袞闕以熙帝重不幸寤疾年七十有一建安四年
六月卒惜乎懷道虛否登庸日寡實使大業不究元勳
靡建茲海內所為嗟悼凡百所以失望也天子愍焉使
者弔祭群卿以下臨喪會者子曰群追惟蓼莪罔極之
恩乃與邦彥碩老咨所以計功稱伐銘贊之義遂樹斯
石用監于後其辭曰

於穆上德時惟我君固天縱之天鍾厥純命世作則實

紹斯文遭險龍潛抗志浮雲所貴在已樂存事親雖處
畎畝天子屢聞乃階即將陪帝作鄰平原冠深遂辭其
民思齊古公邠土是因不忘諗國惠我無垠復命喙舌
秉國之均爰登卿士媚茲一人如何穹蒼不授遐年數
厥在位每懷不申股肱或虧朝誰與詢梵梵小子號泣
于旻勒銘表德久而彌新

漢廬江太守范府君碑

君諱式字

字

功存有夏寔曰御龍

闕

昨商周世昭其

隆晉主夏明有士會者光演弘謨翼宗霸業錫邑命族

闕為范氏則其後也君稟靈醇之茂度體玄亮之殊高

徽柔懿恭明允篤恕九德靡爽百行淵備弘道耽藝恢

韜墳籍探蹟研機罔深不入若乃立德隆禮樹節實真

志諒足以弼國篤友足以輔仁用能昭其洪懿聲充宇

甸接華彥於汝墳潤枯斃於荆漢超管鮑之遐蹤信靈

諱乎炳煥是以闕化泉流芳闕鴻舊耀仁闡於權輿濟

俗侔乎皇訓群公偉焉弓旌盈路再讓考闕二三府舉

高第侍御史拜冀州刺史糾剔瑕慝六教允施翰飛肅

於鷹揚典刑闕二軌闕帝闕其動遷廬江太守擬泰和

以陶化昭八則以隆治彌闕弘略惠訓亡倦闕二協闕

字齊闕二清源之深閱寶疏氏之至順以疾告辭韜光

潛耀誅琴詩以寧闕九其猶充洽外內寔紹德之奧藪

而儀民之淵表也未亮三事闕三終闕六常山相暨子

汜孫而胤嗣罔繼粵青龍三年正月丙戌縣長汝南薛

闕七感靈壇之不饗思隆懿模以紹奕世乃與縣之碩

儒咨典謨之中闕同宗闕三之胃昭告祖考俾守厥祀

本著宣融之祚人神協休茂之慶焉禮也於是鄉闕

字上計椽翟循州部泰山從事史翟邵等僉以為君雖

輝名載籍光颺前列而靈墳亡闕儀問闕述遂相與略

依舊傳昭撰景行刊銘樹墓以聲闕世辭曰

於昭上德實唐之胤誕表靈和蹈規履信窮神周覽祇

道之訓邁德微猶鴻漸闕舊穢彼夸毗實此醇懿以文

會友以仁翼闕敷化濟殖群生以遂末言思孝民之攸

暫如何昊天不信其軌明德不報胤亡紀爰輯訓典詢

爾髦士育茲赫以求遐祉詒厥孫謀耀于萬祀

魏大饗碑

惟延康元年八月旬有八日辛未魏王龍興踐祚規恢

鴻業構亮皇基萬邦統世忿吳夷之凶暴滅蜀虜之

逆于赫斯怒順天致罰舊虓虎之校簡猛銳之卒爰

六軍率匈奴暨單于烏桓鮮卑引弓之類持戰百萬控

弦千隊玄甲曜野華旗蔽日天動雷震星流電發戎備

素辨役不更藉農夫安疇尚不變肆是以士有拊譟之

驩民懷惠康之德皇恩所漸無遠不至武師所加無強

不服故寬令西飛則蜀將東馳六旆南徂則吳黨委質

二虜震驚魚爛渚潰將汎自三江之流方軌叩來之阪

斬吳夷以洗鉞血蜀虜以豐鼓曜天威於遐裔復九圻

之疆寓除生民之災孽去聖皇之宿憤次于舊邑觀豐

而動築壇壝之官置表著之位大饗六軍爰及譙縣父

老男女臨饗之日陳兵清涂慶雲垂覆乃備俾禦整法

駕設天官之列衛乘金華之鸞路建升龍於大常張天
狼之威弧千葉風舉萬騎龍驤威靈之飭震曜康衢既
登高壇蔭九增之華蓋處流蘇之帷坐陳旅酬之高會
行無筭之酣飲于酒波流沓丞陵積警師設縣金奏讚
樂六變既畢乃陳祕戲巴俞九劍奇舞麗倒衝夾踰鋒
上闕踰高舩鼎緣幢舞輪擿鏡騁狗逐兔戲馬立騎之
妙技白虎青鹿辟非辟耶魚龍靈龜國鎮之恠獸環變
屈出異巧神化自鄉校將守以下下及陪臺綵園莫不
歆淫宴喜咸懷醉飽雖夏啓均臺之亨周成歧陽之猋
高祖邑中之會光武舊里之宴何以尚茲是以刊石立
銘光示來葉其辭曰

赫王師征南裔舊靈威震天外吳夷讎蜀虜竄區夏清

八荒艾辛舊邦設高會皇德洽洪恩邁刊金石光萬世
制命孔羨為宗聖侯奉家祀碑文 曹子建

惟黃初元年大魏受命胤軒轅之高蹤紹虞氏之遐統
庶曆數以改物揚仁風以作教於是輯五瑞班宗彝鈞
衡石同度量秩群祀於無文順天時以布化既乃緝熙
聖緒昭顯上世追存三代之禮兼紹宣尼之後以魯縣
百戶命孔子二十一世孫議即孔羨為宗聖侯以奉孔
子之祀制詔三公曰昔仲尼負大聖之才懷帝王之器
當衰周之末無受命之運在晉衛之朝教化乎洙泗之
上栖栖焉皇皇焉欲屈已以存道貶身以救世於是王
公終莫能用之乃退考五代之禮脩素王之事因魯史
而制春秋就太師而正雅頌俾千載之後莫不宗其文

以述作仰其聖以謀咨可謂命世大聖億載之師表者也遭天下大亂百祀墮壞舊居之廟毀而不脩褒成之後絕而莫繼闕里不聞讓誦之聲四時不睹蒸嘗之位斯豈所謂崇禮報功盛德必百世祀者哉嗟乎朕甚憫焉其以議卽孔羨爲宗聖侯邑百戶奉孔子之祀令魯郡脩起舊廟置百戶卒吏以守衛之又於其外廣爲屋宇以居學者於是魯之父老諸生遊士睹廟堂之始復觀俎豆之初設嘉聖靈於髣髴想禎祥之來集乃慨然而嘆曰大道衰廢禮樂絕滅三十餘年皇上懷仁聖之懿德兼二儀之化育廣大包於無方淵深淪於不測故自受命以來天人咸和祥氣氤氳嘉瑞踵武休徵屢臻殊俗解編髮而慕義遐夷越險阻而來賓雖太皞遊龍以君世虞氏儀鳳以臨民伯禹命玄宮而爲夏后西伯由岐社而爲周文尚何足稱於大魏哉若乃紹繼微絕興脩廢官疇咨稽古崇配乾坤况神明之所福作宇宙之所觀欣欣之色豈徒魯邦而已哉爾乃感般人路寢之義嘉先民泮宮之事以爲高宗僖公蓋嗣世之王諸侯之國耳猶著德於三頌騰聲於千載况今聖皇肇造區夏創業垂統受命之日曾未下輿而褒美大聖隆化如此能無頌乎乃作頌曰

煌煌大魏受命溥將繼體黃唐包夏令商降釐下土廓清三光群祀咸秩靡事不綱嘉彼玄聖有赫其靈遭世霧亂莫顯其榮褒成旣絕寢廟斯傾闕里蕭條靡韶靡馨我皇悼之尋其世武乃建宗聖以紹厥後脩復舊堂

豐其薨宇莘莘學徒爰居爰處王教既新群小過沮魯道以興未作憲矩洪聲豈遐神祇來和休徵雜還瑞我邦家內光域區外被荒遐殊方慕義搏拊揚歌於赫四聖運世應期仲尼既沒文亦在茲彬彬我后越而五之垂於億載如山之基

曹娥碑文

邯鄲子叙

孝女曹娥者上虞曹盱之女也其先與周同祖未嘗荒流爰茲適居盱能撫節按歌婆娑樂神以漢安二年五月時迎五君逆濤而上為水所淹不得其屍時娥年十四號慕思盱哀吟澤畔旬有七日遂自投江死經五日抱父屍出以漢安迄于元嘉元年青龍在辛卯莫之有表度尚設祭誄之辭曰贊伊孝女擘擘之姿備其反而令色孔儀窈窕淑女巧笑倩兮宜其家室在洽之陽大禮未施嗟喪慈父彼蒼伊何無父孰恤訴伸告哀赴江未號視死如歸是以眇然輕絕投入沙泥翩翩孝女載沉載浮或泊洲渚或在中流或趨湍瀨或逐波濤千夫失聲悼痛萬餘觀者填道雲集路衢泣淚掩涕驚慟國都是以哀姜哭市杞崩城隅或有尅面引鏡務耳用牙坐臺待水抱樹而燒於戲孝女德茂此傳何者大國防禮自修豈况庶賤露屋草茅不挾自直不鏤自彫越梁過宋比之有殊哀此貞厲千載不渝嗚呼哀哉辭曰名勒金石質之乾坤歲數歷祀立廟起墳光于后土顯昭天人生賤死貴利之義門何帳華落飄零早分葩艷窈窕末世配神若克二女為湘夫人時效髮髯以昭後

昆

魏散騎常侍步兵校尉東平太守碑

嵇叔夜

先生諱籍字嗣宗陳留尉氏人也厥遠祖陶化於上世
先生弘謨於後代詩所載阮國則是族之本也先生
承命世之美希達節之度得意忘言尋妙於萬物之始
窮理盡性研幾於幽明之極和光同略群生莫能屬也
確乎不可拔當塗莫能貴也或出或處與時升降或默
或語與世推移望其形者猶登嶽涉海蕩然無以究其
高測其深覽其神者猶旁璞親珪肅然無不欽其實而
偉其奇也不屑夷齊之潔故其清不可尚也不履惠連
之汗故其道不可屈也遽環昇降於卷舒寤去就於

愚智顧盼一子不亦泰如危宗廟之犧安不靈之龜故
無孤犢之逼而有塗中之廣觀屈穀鳴鴈是以處下才
之間察巨輶緯帶是以遊有用之際夸大辨而御之以
訥資大白而濟之以厚一作辱為無為而名不能累也事
無事而世不能役也訪垂天之翼於寂寞之域投芒刀
之穎於有解之會固恢恢必有餘地豈若接輿被張以
養生於陵灌園以求實齷齪近步脩一作循軌轍而已哉
尼父議老成於遊龍衛賜譬重仞於日月揆之先生其
殆庶幾乎方將攀逸駕於洪涯懇遐軌於巢州跨宇宙
以高挹凌雲霄以優游享年如干遘病而卒於是遠鑒
之士有識之徒先生之没夫豈不慨然臨豪傑而存惠
之問運斧斲而思郢人之力乃探頤索隱以叙雅操使

將來君子知莊生之跡略舉其志埋之曰我哉先生天
挺無欲玄虛恬淡混濟榮辱盪滌穢累婆娑山足胎胞
造化韜蘊光燭鼓棹滄浪彈冠嶠岳願神太素簡遺世
局澄之不清溷之不濁翺翺區外遺物庶俗隱處
反真歸漠汪江淵源邁跡圖錄

車騎將軍賀婁公碑文

庚子山

昔者軒立命氏初分兄弟之性若水降居始遠諸侯之
國自是以官爲族因地爲宗水派祇分其可知矣公諱
慈字元達本姓張清河東武城人也仕於周張仲爲孝
友謀於晉張彥爲賢臣韓有開地則五世強國趙有孟
談則三卿不戰祖慶少習邊將馮伏智勇雖復五車竹
簡不取博士之名一卷兵書即以將軍自許角端在手

必無齊魯之侵蓮花插腰甚得蛟龍之氣爲車騎大將
軍儀同三司散騎常侍霸城縣開國伯贈河州刺史父
璨公子公孫有鏃基於天下良弓良冶有世業於家風
書則百家可知劍則千人可敵三槐以鷲鳥象物知其
神姦五等以桓珪旆疑瑞守其宮室君以才望兼而受
之終於使節車騎大將軍儀同三司散騎常侍武定縣
開國公贈河州刺史 兼山岳之靈受星辰之氣年在
髣髴甫就勝衣竹馬來迎已之名於郭及羊車在道即
見賞於王澄豈直童子明經書生說卦而已至如禪河
清論秋水高談故以辨折龜林聲馳鹿野國家官族君
爲首姓起家車騎大將軍儀同三司襲爵爲公增邑合
一千六百戶弱冠登朝傳呼甚寵漢魏台鼎故無此

中朝方伯罕有其年大冢宰任惣機衡是勤王略惜君
忠壯委以爪牙乃領左廂親信出 梁州防主華陽西
極漢水東流巴濮既寧沉黎即靜保定四年王師北伐
以君驍勇被召將兵師下宜陽身登函谷將燒白馬之
城以覆烏巢之壘既而中途甚雨未獲圍原軍師聞喪
不成侵宋柱國趙王今上之第九弟也文則河間上書
武則任城置陣作鎮岷丘揚旆錦水白虎之俗難安黃
龍之盟不定以君智畧入佐中權天和元年授使持節
大都督治柱國惣府司錄仍轉司馬餘官封如故相如
西喻鏤石於靈山武侯南征浮船於瀘水方之今日彼
獨何人九品課工爲上之下四年入朝歸事宰旅即受
戰即大夫將命齊國尋盟出境即用和鄰入國聞喪仍
從會葬之禮可使南面此之謂乎尋以本官入治軍正
至如渭水兵書在心爲志軒立陣法聚石成圖既得師
不疲勞兵無怨讟入陪中禁更領儀同邸客城池門闌
戶籍咸負巡警並用司存帝城近臣公室密戚如逢司
諱似畏都官旣而孤城鄭姬不相其年巴水深翁不醫
其疾春秋三十有三奄捐官舍呂子明之疾甚歎軫吳
王阮元瑜之長逝悲深魏主有詔贈某官禮也以建德
四年三月日歸葬於河州苑川郡之禁山公六郡良家
西河鬲族地壯金行人雄塞氣兵書七卷河水浮來射
法三篇天孤夜下鋒旗不息刁斗恒驚猶得馬上讀書
軍中習禮太史子義善於謀策諸葛公休長於撫馭四
代儀同三司七世河州刺史鍾鼎成列冠蓋連陰所謂

生為貴臣死為貴神者也但以遊魂久客反葬途遠道
阻山長妻孤子幼哀聲滿野愁氣連雲况復松檟飄颻
方臨武威之戍丘陵廻遠直對臨兆之城馬授亡於武
溪尸柩返於魏里梁鴻死於會計妻子歸於平陵嗚呼
哀哉崎嶇遠矣昔者繁昌祠前即有黃金之碣德陽墓
下猶傳青石之碑是謂勒功乃為銘曰

七葉佐漢五世相韓忠臣入仕孝友當官青城仙洞黃
石祠壇臺堪走馬書足迴鸞武定風飈霸城嚴肅並馳
雙傳俱分兩竹重世刺舉連鑣衣服草靡青丘風馳赤
谷世不乏賢挺茲上嗣孝有三德忠無二志劔足身挺
書堪面試於節既秉高蟬且珥龜轉印函蛇盤綬笥左
右將軍前後常侍繼踵五侯因循三事於旗几坂艦舳

雙流還柩大馬更引金牛江波錦落火井星浮躡酒
帝安歌蜀侯受脰河陽偏師洛浦署陣成臯連旗廣武
朝兵咸竈夜營多鼓箭起六塵鋒摧九虎倏忽人世俄
然今古崇發兩星繫驚二豎遊魂通夢言反舊塋紫泥
賜冊黃腸贈行途登石紐路入金城寒關樹直秋塞雲
平劔埋合柱書藏鑿楹武侯為廟樂公為社雲蓋低臨
霓裳紛下碑枕金龜松橫石馬未矣身世留名華夏

墓誌

徵君何先生墓誌

簡文帝

先生履玉燭之禎氣應大賢之一期實生而知機撫塵
斯庶敬非習起孝乃因心聚徒教習學侶成群與沛國
劉瓛汝南周顒為友陸璉賀瑒之徒更道北面未明中

王文憲儉受詔撰禮未竟而卒屬在司徒文宣王王以讓先生因廣加刊緝故以含文燕居說六典五恩之義或齊侯所不鎮孟嘉所未知皆折茲大物成此良教小人道長每諷考槃之詩君子道消便執天山之筮乃毀車挂冠拂衣東嶺始居若耶來從秦望今上經綸天地權輿鼎業始徵為軍謀祭酒實允文若之舉且光彥先之選又徵特進右光祿大夫高尚其事確乎不拔玄纁徒往東帛虛歸而給白衣尚書祿固辭不受卒窆乎其山正衾在殯啜鏤器與玉衣堯典入棺趾密章及書綬知與不知並懷惋愴咸以人亡素楛禮墜文章洙泗頽經扶風罷學關西疑聖之德自此長淪高松引風之氣於茲未息余昔在殊方亟枉翰迹欽風味道迄淹歲特旣而位阻桂宮塗塗再咫尺不獲擁經步至問春卿之病徐輪三反入杜夷之舍痛祥雲之滅采悲列曜之晞暉追勒高鄉乃為銘曰

文範高世玄晏絕倫復有令德遠之與均誰與均此嗚呼哲人第五肥遁餘軌尚遵司空開學其風不泯傳茲孝敬曰悌且仁氣高瓊岳心虛谷神括羽儒囿舟輿席珍旣遊慧水兼引法輪談扇猶在鳴琴尚陳如何不勲德素長淪寂寥巖穴荒涼渭濱橋曰隻雞徐稱酌素余欽夫子風期夙著蓄思含毫傳芳寘譽沉礎雖貞玄泉無曙

司空章昭達墓誌

徐陵

周原膺膺佳氣葱蔥王業攸興帝圖斯盛在昔光武佐

命鄰縣者鄧侯高祖元臣同郡者蕭相公台輔之量便
著綺紈瑚璉之姿無待雕琢起家爲東宮直前所奉之
君則梁簡文皇帝旣而黑山巨盜憑陵上國白水疆胡
虔劉中夏公傾其產業恭是驍雄思報星儲累殲鯨寇
屬幽風有象代邸方降搜荆楚之英才資班輸之妙略
百樓忽起登雲霄而俯臨萬弩俱張隨雷霆而並震揚
兵於九天之上決勝於千里之中殪彼群兇皆無旋踵
陳寶應至懷反叛客引周迪資其食力更事窺窬公奉
詔崇朝飲水將力前茅後勁步驟奔馳仍同甌閩殄其
窠窟若夫鳴虵之洞深谷隱於蒼天飛猿之嶺喬樹參
於雲日宜越艇而登嶠蒙巖犀而涉江威武紛紜震山
風海於是咸俘僞師悉據高墉爰泊滄溟莫不懲又旣
而齊人無信將謀郢藩闢艦七船窺江淹漢公纔聞羽
檄遽稟師期馳襲荆郢應時浩蕩方欲宣威隴汧太討
梁華屬上將之韜光逢中台一掩曜大建三年薨於軍
幕爾乃青烏柏墓白鶴標墳林有逃車樹同華蓋前旌
能軼後乘龍輪介士發三河之民哀鏡同駟馬之曲長
安傳坐恩禮盛於西京襄陽墮淚悲慟喧於南峴

行狀

齊司空曲江公行狀

任彥升

公稟靈景宿擅氣中和一匱初登東嶽之功可監埏埴
在器瑚璉之姿先表豈惟荆南有聖童之目襄城著孔
甫之稱而已哉故以羽儀宗家冠蓋後進路叔之一日
千里北海之稱美共治方斯茂如也志學之年偏治經

紀登隆十載網羅百氏藻斷瞻逸蔚為詞宗延賈誼而
升堂攜相如而入室加以翰牘精辯發言有章持論從
容辭無矜尚自河洛丘墟歷載二百俾我逢掖遂淪左
袵晉宋所以遺恨祖宗是用顧懷公自荷方任志在尅
復將欲使功遂之日身退有所爰乃卜宇金陵縈帶林
壑用辭聊城之賞以為疏韓之館人謝運往遂輟遠圖

齊司空柳世隆行狀

沈休文

公稟靈華嶽幼挺珪璋清襟素履發乎韶非及長風質
洞遠儀止祥華動容合矩吐言被律時沈攸之狼據陝
西氣陵物上而太祖登庸作宰夫歷在躬攸之播封豕
之情愬令荆之力兕甲十萬鐵馬千群水陸長驚志窺
皇邑公抗威川涘勇略紛紜顯晦有方出沒無緒攸之
乃反旆亘圍親受矢石增櫓乘埤嚴衝駕雉雲輶俯闕
地冗斜通半藏晚食負戶晨汲公綏衆以武應敵以奇
靈鋒電曜威策雲舉事切三版之危氣損九天之就殘
冠外老逆黨內雜焚舟委甲掬指宵遯公風標秀徹器
範弘潤茂乎辭彩雅善鼓琴摛純蔡之高芬纂鍾磬之
妙曲雖嬰拂世務而素業三臨蕩旬五職瑞扇一司百
揆固可以齊衡八凱方駕五臣

江都葛澗校

唐文選卷第七十八

明通議大夫都察院右副都御史大庾劉節廣

吊文

吊夷齊文

王仲宣

歲及秋之仲月從王師以南征濟河津而長驅踰芒阜
之崢榮覽首陽於東隅見孤竹之遺靈心於悒而感懷
意惆悵而不平望壇宇而遙吊抑悲古之幽情知養老
之可歸忘除暴之為世繫已窮以騁志愆聖哲之大倫
忘舊惡而希古退採薇以窮居守聖人之清槩要既死
而不渝厲清風於貪士立果志於懦夫到于今而見稱
為作者之表符雖不同於大道今尼父之所譽

吊孟嘗君文

潘安仁

人罔貴賤士無真偽入如歸望賓若企出握秦機入專
齊政右眄而羸強左顧而田競且以造化爲水天地爲
舟樂則齊喜哀則同憂豈區區之國而大邦是謀瓊瓊
之身而名利是求畏首畏尾東奔而囚志撓於木偶命
懸於狐裘

吊賈誼文

庾仲初

中興二十三載余忝守衡南鼓棹三江路次巴陵望君
山而過洞庭涉湘川而觀汨水臨賈生投書之川慨以
永懷矣及造長沙觀其遺象喟然有感乃吊之云

偉哉蘭茝而芳玉產而繁陽葩熙水寒松負雪莫邪挺
鏑天驥汗血苟云其雋誰與此傑是以高明倬茂獨發
奇秀道率夫真不議世疾煥乎若望舒耀景而焯群星

矯乎若翔鸞拊翼而逸宇宙也飛榮洛汭擢穎山東質
清浮磬聲若孤桐琅琅其璞巖巖其峯信道居正而以
天下爲公方駕逸步不以曲路期通是以張高弦悲聲
激柱落清唱未和而桑濮代作雖有惠音莫過韶濩雖
有騰鱗終仆一壑嗚呼大庭旣邈玄風悠緬皇道不以
登陸上德不以仁顯三五親譽其軌可仰而標霸功雖
逸其塗可翼而闡悲矣先生何命之蹇懷寶如玉而生
運之淺昔咎繇謨虞呂尚歸昌德協充符乃應帝王夷
吾相桓漢啓蕭張草廬三顧臭若蘭芳是以道隱則蠖
屈數感則鳳覩若棲不擇木翔非九五雖曰玉折雋才
何補夫心非死灰智必存形形託神川故能全生柰何
蘭膏揚芳漢庭摧景颯風獨喪厥明悠悠太素存亡一

指道來斯通世往斯圮吾哀其生未見其死敢不敬吊
寄之渌水

吊莊周文

稽君道

帝堦王弘遠華池豐屋黃延賢彥圖莊生垂綸之象記
光達辭聘之事畫真人於刻桶之室載退士於進趣之
堂可謂託非其所可吊不可讚也其辭曰

邁矣莊周天縱特放大塊授其生自然資其量器虛神
瀆窮玄極曠人偽俗季貞風既散野無訟屈之聲朝有
爭寵之歎上下相陵長幼失貫於是借玄虛以助溺引
道德以自獎戶詠恬曠之辭家畫老莊之象今王生沈
淪名利身尚帝女連耀三光右出無處池非巖石之溜
宅非茅茨之宇馳屈產於皇衢畫茲象其焉取嗟乎先
生高迹何局生處巖岫之居死寄彫楹之屋託非其所
沒有餘辱悼大道之湮晦遂含悲而吐曲

祭文

祭橋公文

曹孟德

故大尉橋公誕敷明德汎愛博容國念明訓士思令模
靈幽體翳邈哉晞矣吾以幼年逮升堂屋特以頑鄙之
姿爲大君子所納增榮益觀皆由獎助猶仲尼稱不如
顏淵李生之厚嘆賈復士死知己懷此無忘又承從容
約誓之言殂逝之後路有經由不以斗酒隻雞過相沃
酌車過三步腹痛勿恠雖臨時戲笑之言非至親之篤
好胡肯爲此辭乎匪謂靈忿能貽已疾懷舊惟歡念之
悽愴奉命東征由次鄉里北望貴土乃心陵墓裁致薄

莫公其尚饗

祭墓文

王逸少

維永和十一年三月癸卯朔九日辛亥小子羲之敢告
二尊之靈義之不天夙遭閔凶不蒙過庭之訓母兄鞠
育得漸庶幾遂因人之蒙國寵榮進無忠孝之節退違
推賢之義每仰詠老氏周任之誠常恐斯亡無日憂及
宗祀豈在微身而己是用寤寐未歎若墜深谷止足之
分定之於今謹於今日吉辰肆筵設席稽顙歸誠告誓
先靈自今之後敢渝此心貪冒苟進是有無尊之心而
不子也子而不子天地所不覆載名教所不得容信誓
之誠有如皦日

祭程氏妹文

陶淵明

維晉義熙二年五月甲辰程氏妹服制再周淵明以少
牢之奠俛而酌之嗚呼哀哉寒往暑來日月寢踈梁塵
委積庭草荒蕪寥寥空室哀哀遺孤肴觴虛奠人逝焉
如誰無兄弟人亦同生嗟我與爾特百常情慈妣早世
時尚孺嬰我年二六爾纔九齡爰從靡識撫髻相成咨
爾令妹有德有操靖恭鮮言聞善則樂能正能和惟友
惟孝行止中閨可象可倣我聞為善慶自己蹈彼蒼何
偏而不訢報昔在江陵重罹天罰兄弟索居乖隔楚越
伊我與爾百哀是切黯黯高雲蕭蕭冬月白雲掩晨長
風悲節感惟崩號興言泣血尋念平昔觸事未遠書疏
猶存遺孤滿眼如何一往終天不返寂寂高堂何時復
踐藐藐孤女曷依曷恃筑筑遊魂誰祀柰何程妹於此

永已死如有知相見蒿里嗚呼哀哉

祭從弟敬遠文

陶淵明

歲在辛亥月惟仲秋旬有九日從弟敬遠卜辰云窆未
寧后土感平生之游處悲一往之不返情惻惻以摧心
淚愍愍而殞嗟乃以園果時醪祖其將行嗚呼哀哉於
鑠吾弟有操有槩孝發幼齡有自天愛少思寡欲靡執
靡介後已先人臨財思惠心遺得失情不依世其色能
溫其言則厲樂勝朋高好是文藝遙遙帝鄉爰感竒心
絕粒委務考槃山陰淙淙懸溜曖曖荒林晨採上藥夕
閑素琴曰仁者壽竊獨信之如何斯言徒能見欺年甫
過立奄與世辭長歸蒿里邈無還期惟我與爾匪但親
友父則同生母則從母相及齟齬並羅偏咎斯情實深
斯愛實厚念疇昔日同房之歡冬無緼褐夏渴瓢簞相
將以道相開以顏豈不多之忽忘飢寒余嘗學仕纏綿
人事流浪無成懼負素志斂策歸來爾知我意常願攜
手寘彼衆意每意有秋我將其刈與汝偕行舫舟同濟
三宿水濱樂飲川界靜月澄高風始逝撫杯而言物
久人脆柰何吾弟先我離世事不可尋思亦何極日徂
月流寒暑代息死生異方存亡有域候晨來歸指塗載
步呱呱遺稚未能正言哀人禮儀孔閑庭樹如故
齋宇廓然孰云敬遠何時復還余惟人斯昧茲近情著
龜有吉制我祖行望燒香執事冰盈神其有知昭余
中誠嗚呼哀哉

自祭文

陶淵明

歲惟丁卯律中無射天寒夜長風氣蕭索陶子將辭逆
旅之館未歸於本宅故人懷其相悲同祖行於今夕羞
以嘉蔬薦以清酌候類已冥聆音愈漠嗚呼哀哉茫茫
大魂悠悠高曼是生萬物余得為人自余為人逢運之
貧簞瓢屢罄絺綌冬陳舍歡谷及行歌負薪翳翳柴門
事我宵晨春秋代謝有務中園載耘載耔迺育迺繁欣
以素牘和以七弦冬曝其日夏濯其泉勤靡餘勞心有
常閒樂天委分以至百年惟此百年夫人愛之懼彼無
成愒日惜時存爲世珍沒亦見思嗟我獨邁曾是異茲
寵非已榮涅豈吾錙粹兀窮廬酣飲賦詩識運知命疇
能固眷余今斯化可以無恨壽涉百齡身慕肥遁從老
得終奚所復戀寒暑逾邁亡既異存外姻晨來良友宵
奔葬之中野以安其魂窅窅我行蕭蕭墓門奢侈宋臣
儉笑王孫廓兮已滅慨焉已遐不封不樹日月遂過匪
貴前譽孰重後歌人生實難死如之何嗚呼哀哉

祭周居士文

謝惠連

維君陶造化之純元侔先哲之遐蹤體無事於高尚蹈
虛素乎中庸不臣天子不事諸侯公辟弗盼王命匪酬
窮歡極樂帶素被裘

祭禹廟文

謹遣左曹掾奉水土之羞敬薦百帝之靈咨聖繼天載
誕英微克明克哲知章知微運此宏謨卹彼民憂身勞
五岳形疲九州呱呱弗顧虔虔是欽物貴尺璧我重寸
陰乃錫玄圭以告成功虞數旣改夏德乃隆臨朝總政

巡國觀風淹留稽嶺乃徂行宮恭司皇役敬屬暉融神
且略薦乃昭其忠

祭虞舜文

顏延年

惟哲化神繼天作聖藏器漁陶致身愛敬是以二妃嬪
德九子觀命在麓不迷御衡以正唐歷既終虞道乃光
咨堯授禹素阻采堂百齡厭世萬里涉方敬詢故老欽
咨聖君職奉西湘虔屬南雲神之聽之匪酒伊萱

祖祭弟文

闔棺窮野啓殯中荒靈影夙滅寢虛張人性運來自
秋祖陽蕃蘭落色宿草滋長孰云不痛辭家去鄉爾之
于役爰適茲邑上秋告來方春佇立如何不吊吉違凶
集六親懂心姻朋浩泣我雖載奔伊何云及永懷在昔
追亡悼存惟兄及弟瞻毋望昆生無榮嫵沒望歸魂令
龜吉兆祖襯東旋靈轅次露巖舟在川廓然何及痛矣
終天

祭雜墳文

任孝恭

惟爾冥然往代求圓石而無名邈矣遐年討方專而不
記封樹漂殄誰別羽商之家墳壟傾迴終迷庚癸之向
近創此伽藍寔湏泥丸命彼碩人置茲屯邑不謂綸繩
所用遂毀午亭之基銀鐻所侵爰傷馬鬣之勢重使翠
幕臨風佳城見日昔靈沼枯骨周王改以衣冠廣武橫
尸漢主如其轉櫛勒彼山虞覆頽隍於舊趾命茲匠
者修反壤於故林還蟻結文文依以坊之勢幸得宜陽
大道無變無移宗兆長阿勿迴勿徙庶幽魂遊止踐昔

徑而不疑塗車往還瞻舊轍而猶在

祝文廣

祭告天地群神文


漢光武

皇天上帝后土神祇眷顧降命屬秀黎元為人父母秀不敢當群下百辟不謀同辭咸曰王莽篡位秀發憤興兵破王尋王邑於昆陽誅王郎銅馬於河北平定天下海內蒙恩上當天地之心下為元元所歸識記曰劉秀發兵捕不道卯金修德為天子秀猶固辭至于再至于三群下僉曰皇天大命不可稽留敢不敬承

祭告天地神祇文

漢昭烈

惟建安二十六年四月丙午皇帝備用玄牡昭告皇天上帝后土神祇漢有天下歷數無疆曩者王莽篡盜光武皇帝震怒致誅社稷復存今曹操阻兵安忍戮殺主后滔天泯夏罔顧天顯操子不載其凶逆竊居神器群臣將士以為社稷隳廢備宜修之嗣武二祖翼行天罰備雖否德懼忝帝位詢於庶民外及蠻夷君長僉曰天命不可以不答祖業不可以久替四海不可以無主率上式望在備一人備畏天明命又懼漢邦將湮于地謹擇元日與百寮登壇受皇帝璽綬修燔產告類于天神惟神嚮祚于漢家永綏四海



廣文選卷第七十八

廣文選卷第七十八

